



特 別
A18
4892
21



~18
4892
21

明詩綜卷五十八

小長蘆

朱彝尊

錄

休湯

程

岳

緝評



朱之蕃 一首

之蕃字元介南京錦衣衛籍荏平人萬曆乙未
賜進士第一授翰林院修撰以右春坊右諭德
掌院印以右春坊右庶子掌坊印升少詹事進
禮部右侍郎改吏部右侍郎贈禮部尚書有使
朝鮮橐南還紀勝諸集

靜志居詩話元介文翰兼工張檀東國與館
伴周旋有倡必和微嫌詩材懶熟語不驚人

和周吉甫春日移居

明詩綜卷五十八

牆短山齋出庭空月易留泉香浮茗盃漁唱起蘋洲終
歲一無事平生百不憂奔忙渾未解酒伴且相求

一作自
苦復何

由

湯賓尹 一首

賓尹字嘉賓宣城人萬曆乙未賜進士第二授
翰林院編修歷中允諭德掌司業事遷右庶子
升南國子監祭酒有睡菴集

詩話嘉賓以黨論受攢幾終以不振詩派
近體罕足錄者詩中所弔懷寧於國重也

弔同年友於鼎季

落木淒淒江水渾行吟澤畔已聲吞三年地下君安否
人世風波不可言

孫慎行 一首

慎行字聞斯武進人萬曆乙未賜進士第二授
編修歷中允諭德庶子少詹事升禮部右侍郎
回籍起南京禮部尚書改北卒贈太子太保謚
文介有玄晏齋集

詩話要典三案羣小切齒者挺擊則朝邑王侍郎移宮則應城楊忠烈
紅丸則文介也要典既頌至欲坐公等罔上不道幾且殺公幸思陵即
昨得辭成所復官仍堅卧不起久而赴召甫及都而卒平居研精易學
吟咏不甚留意其觀元祐黨人碑有感作云誰知黨人籍翻作褒忠碑
曠世相感今
古同然矣

遭遇

誰料恩深放棄餘山人猶帶舊銜居中山篋在猶寒膽
上殿爭時判引裾天地有情開一網江湖無夢到三閭

自來多少歛歔感聖主英明古不如

劉一燦一首

一燦字季晦南昌人萬曆乙未進士改庶吉士授簡討歷官禮部尚書兼東閣大學士加太子太保戶部尚書進文淵閣加少保再進少師兼太子太師吏部尚書中極殿大學士卒贈太師謚文端有集

歸田作

乞得閒身返故林避賢者路漫沉吟當歸分合山中老
戀主情彌闕下深鑿井耕田歌帝力量情較雨答天心
十年塵夢今番破一曲滄浪思不禁

陳于廷

萬曆

于廷字孟諤宜興人萬曆乙未進士授光山知縣補秀水擢監察御史巡按江西山東轉太僕少卿歷太常卿大理卿兵部侍郎坐削籍起南京都察院右都御史召總內臺加太子少保謚恭定有定軒橐

詩話恭定為子友其年檢討之祖行事詳國史韻語不甚傳擬江文通雜詩頗稱具體

古別離

三歲為君婦未嘗下高堂一朝遠送別佇泣官道傍君
行官柳青君歸官柳黃與君別經年相思莫相忘行過
無定河莫飲無定水天涯游子心飲之恐爾爾應思閨

中人容光易摧毀

擬陳思王贈丁儀王粲

王師入京邑天宇俄廓清九廟肅鐘簋十陵翦棘荆
皇路日就坦相君靡自盈吐哺則公旦闢門羅雋英
黃髮縹緜組深巖賁弓旌嗟余同心侶夙昔諧嚶鳴
胡爲慕孤介堅欲解世纓延陵匪通誼干木庸近情
願迴墨子車且過朝歌城

擬王侍中粲懷德

關中構喪亂浮渭向洛城京雒復殘破子身道蠻荆
虎兇傷在野流離嗟獨行河山邈非故魂魄黯自驚
乘桴浮海若登樓眺神京目斷秦川樹心搖伊闕旌
哀哀孤

飛鳥詎有擇木情公子忽我覲欬唾分瓊瑛魚藻醉
明德鹿茸賡和鳴鄙人守貞則嘉惠懷篤誠所期慎厥修
福履永不傾

擬謝僕射混遊覽

大塊真勞生俯仰日縈感內庭鮮懽悰遠郊豁幽覽
寓目極寥廓開襟愜澄澹巖阿秀菊庾江澹揭葭莢會歎
景搖落任觀運流坎代謝亦何常章光總歸闇達人遺
浮榮自視一何歛

擬休上人怨別

楚客思無賴涉秋逾黯然金飈起天末槁葉墮我前素
帷延華月淨琴響哀絃白雪懷郢人滄洲憶成連壺觴

對不舉何以暢幽情

王維儉 一首

維儉字損仲祥符人萬曆乙未進士除知濰縣
徵授兵部主事尋削籍起光祿寺丞累遷大理
少卿以僉都御史撫山東入為工部右侍郎轉

左侍郎有王損仲集

錢受之云損仲詩清婉而近于弱為文求歸簡質未脫蹊徑嘗苦宋史煩蕪刪

定成書吳興潘昭度抄得副本今損仲家圖籍盡沉于汴京之水未知吳興抄本云何

詩話損仲宋史記予從吳興抄得之未見出人意表詩頗劉克

送霍臨 少府守河州

不盡惶中路秋風促官程佩刀辭佐郡分虎已專城積
石攢雲起洮河近郭明羌戎亦赤子休使塞烟驚

王思任 一首

思任字季重紹興山陰人萬曆乙未進士知興
平當塗青浦三縣袁州推官所至鑄級稍遷南
刑部主事九江僉事有避園擬存虞山詠

錢受之云季重

頗負時名自建旗鼓其詩才清爛熳無復持擇

入鬼入魔惡道空出鍾譚之外又一倚派也

勺園

纔辭帝里入風烟處處亭臺鏡裏天夢到江南深樹底
吳兒歌板放秋船

蔡復 一首

復一字敬夫同安人萬曆乙未進士除刑部主

事歷員外郎中出為湖廣參政遷按察使仕至
兵部右侍郎謚清憲有遜菴詩集

詩話景陵之邪說行率先倒戈者蔡敬夫也其駢體亦不屑
猶人亡友漢陽王亦世最賞之然以詩論寧取彼而舍此矣

秋坐

夕照盡歸水秋聲半在林飛蟬過別樹未斷曳來一作音

夕陽

夕陽欲下山一半戀流水短笛牛羊歸餘光照童子

高承祚一首

承祚初名承禪字元錫號鶴城松江華亭人萬
曆壬辰中會試乙未賜同進士出身改庶吉士

授檢討有知古堂集

董思白云鶴城豪飲過
人酒邊賦詩自運機局

詩話太史生時父夢高僧入其門因名之曰承禪及萬曆己卯銅梁高
中允啓愚會稽羅侍讀萬化主考南畿以舜亦以命禹發題監臨者方
懷舜禹傳授之嫌內江陰長卿為應天府尹改填梅作祚後主司以黨
附江陵獲罪鶴城以更名免柱吏議鶴城廉介自持官翰林二十年田
不加半畝屋不改一椽
予聞之李高士延昂云

聚首

人生聚首難離別何可久去日三春花今朝九秋柳沈

九云語不在
深詩家合作

賀燦然二首

燦然字伯闇秀水人萬曆乙未進士授行人升
吏部主事終員外有六欲軒五欲軒集

詩話吳中伍御史秦萃撰林居漫錄詆譏前輩淆亂是非吏部不平作
漫錄評正駁之御史復撰駁漫錄評正吏部又作駁駁漫錄評正兩公
不亦好辨哉然合而觀之曲
直自見國史所宜審擇也

泊彭城

山城多宿雨日暮起悲風賈客行將絕中涓計已窮
聞雙闕迴縣磬九州同應有輪臺詔朝來出漢宮

邯鄲懷古

雲迷襄國雨霏微舊日叢臺過客稀三晉河山仍不改
六王宮殿已全非照者池冷荒臺合講武臺空野雀飛
猶有邯鄲樓上月餘光常照酒人歸

米萬鍾一首

萬鍾字仲詔宛平人萬曆乙未進士除永寧知
縣補銅梁再補六合入為大理右評事遷戶部
主事升員外改工部進郎中出為浙江右參政

升江西按察使有北征吟

詩話先生為水曹郎築園海淀之北中有色空天太一葉松垞翠葆榭
林於滢總名之曰勺園又曰風烟里自念園在郊關不能日涉因繪園
中景為燈丘壑亭臺纖悉具備都人爭尚之號曰米家燈嘗於元夜集
客賦詩麗水呂太常邦耀即席口占二首其一云玉綃疊出上元村雙
炬懸來景物繁悅惚重游丘壑裏米家燈是米家園其二云輕舟寒夜
渡無水波入銀綃訝月升宛似夢中曾一照米家園是米家燈一時和
者數百人列成一集可稱好事亦太平佳話也

新秋泛清溪

共客邀新爽迴舟刺晚風涼生思越苧病起訝燕鴻星
權搖虛白漁燈簇小紅怪來蕭颯早衰草怨吳宮

范允臨二首

允臨字長倩松江華亭人居吳縣萬曆乙未進
士授南兵部主事改工部歷郎中以按察僉事

提學雲南遷福建布政司參議有翰寥館集

錢受

之云長倩意匠浮動墨瀋橫飛未嘗以琢句劈績為工如雪山
池中甄陀女歌聲柔軟能使清淨五百仙人皆心逸不自持

詩話先生筆精墨妙揮毫落紙與董尚書爭工晚築別業於天平山之
陽彈絲吹竹選伎徵歌江表望為神仙中人又得佳調唱和傳鈔片楮
比於珊瑚之鈎范氏家藏遠祖隋其唐時告身尚在文正忠宣諸老
手澤猶新義田長以振窮宰木未嘗改列清門百代四姓遠不及也

有憶

井唾不復顧花飛難再攀江頭一片石應化女郎山

詠翦春羅

君恩宴曲池為郎製宮錦月落杏花寒裁縫剪刀冷

沈琦二首

琦字仲玉吳江人萬曆乙未進士除淄川知縣
以憂歸起補高陵再調三原入為禮部主事有

珠樹軒橐

送馬長山擢守樵李

我家住江南只盼江南路君今正向江南行却望君家
又回顧執手空嗟離別難齊人感咽越人歡只今南北
蒼生望總向循良傳裏看憶昔交君頓成契芝蘭金石
盟前締相逢春日春更融相別秋風秋轉厲江南土俗
舊清嘉到處風光盡可誇天目峰頭雲吐月餘杭城外
水漂花天子黃扉方側席致治思同二千石語君暫作
江南行會捧徵書向江北

別家次諸兄弟韻

握手他鄉路回頭故國城漸驚親舍遠真覺一官輕急

櫂隨雲影悲笳雜鴈聲無情東去水相對亦淒清

沈琬 一首

琬字季玉琦弟與兄同榜登第由鳳陽府學教授遷南國子監博士升南刑部主事歷郎中出知東昌府轉山東按察副使

漂母

偶然一飯進王孫荅贈千金未足論何事怨家還報德
淮陰年少亦推恩

陸錫恩 一首

錫恩字伯承平湖人萬曆乙未進士除萬安知縣入為刑部主事歷員外郎有雙鳧草

詩話伯承不耐判牘放情山水間自號夢蝶居士又號癡
丈人亦號癡丈夫年四十二自撰墳誌而殞詩頗澹雅

鮑叔牙故里

落景滿齊郊雲橫暮山紫緩轡問遺封云是鮑叔里三
北識奇才一匡酬夙恥古人在信心今人多貴耳士苟
未遇時畢生行蓬累長風不我借羽翼安得起所以管
大夫沒齒感知已

袁時選 一首

時選字無擇鄞縣人萬曆乙未進士除遂溪知縣遷南刑部主事

新興道中

偏側新興路逶迤傷水隈萬山迎馬合片雨逐人來

犢騎偏穩江鷗下不猜頻年牽物役延眺亦悠哉

呂克孝 三首

克孝字公原青浦人萬曆丁酉舉鄉試第一官

工部司務歷郎中有媿翁詩草

詩話公原領解之秋先文恪葉文忠偕主試事先公業拔公原卷將置第一矣文忠謂是卷文雖高慮終不得第先公云吾亦知此人不第然學者也榜遂定既而公原屢試南宮輒擯落以學行稱於時先輩衡鑒不爽若是天啓初公原官工部司務時先大父君顯公承蔭選授都察院照磨署經歷司事同公原建首善書院乾魚脫粟比坊慢匠石不有知味書院成大父已遷官故碑記不列名旋為梁夢環所彈下獄思陵即降得釋晚知楚雄府事歸貧不能治舟楫而公原還里詰窘略同其詩有云客歸三日典春衣又云慣住低頭屋能炊折脚鐺殆實錄也

青谿菴

江令何年宅風流不可招荒烟迷斷礎陳迹寄空寮日影移雙樹谿聲自六朝遙分鐘阜影紫翠落層霄

棲霞寺

宅記明僧紹碑傳江總持淒涼自人代窈窕隱山茨明月千巖宿松風萬壑垂階前雙杏樹曾見劫灰時

過田叟

我欲驅黃犢移家傍屋東但容茅蓋頂先為築牛宮

胡震亨 二首

震亨字孝轅海鹽人萬曆丁酉舉人官定州知州有赤城山人藁

歲晏悼室人詩 二首

歲晏感物變志意鮮歡愉念我同懷子涕下沾衣襦如何苦寒節衾裯不復俱空閨一以閉飢鼠晨夜趨光儀

日言錄卷五十一
十一
愧不滅魂魄知有無煩冤日盈抱寧從促景徂
空牀凜寒風殘照慘夜色沉思結幽感夢子來我側踟
躕將何愬容輝忽已匿昔如中洲鳩關關雙鼓翼今如
失羣獸哀鳴不遑食庶無荀生鄙媿彼蒙莊識豈伊生
死情含義良不忒

查應光 一首

應光字賓王休寧人萬曆丁酉舉人有麗崎軒
集

澹碧軒

門開日影來一片蒼苔色花氣引游人山風吹未息

趙秉忠 一首

秉忠字季卿益都人萬曆戊戌賜進士第一除
修撰累官禮部尚書贈太子太保有嶼山集

送張水部南歸

平子歸田去山川賦舊游遺榮纔北闕高興已南州鱸
膾三江月菰蒲五月秋襟期知曠達尊酒寫離憂

顧起元 六首

起元字太初江寧人萬曆戊戌賜進士第三除
翰林編修累遷南京國子監祭酒終吏部右侍
郎兼翰林侍讀學士謚文莊有懶真草堂集遜
園漫稿

方正學先生祠墓

白馬魂空結丹蛇讖豈真九重原叔姪一死自君臣鼎
鑊當時事蒸嘗異代人西山一杯土寂寞亦冬春

於西山不封不樹

舊傳建文君葬

黃河

河水南浮泗漕渠北注燕衆心憂壁馬天意護樓船龍
首疏秦日鴻陂復漢年園陵看王氣松柏正蒼然

彭城

九日彭城道高天白鴈來但聞楓葉下不見菊花開風
起橫蛇澤雲橫戲馬臺江關何處所一望一徘徊

閨體

莫上翠樓看望見官城渡垂柳碧於簾是郎去時路

曉行道中

曉風蕭颯逗疎楊此日關山別恨長試聽高城吹画角
秋河不動月如霜

靈濟宮

星幢霞旆畫繽紛十二瓊樓駐彩雲鸞鶴紫霄時上下
步虛雙引玉晨君

何如寵

一首

如寵字康侯桐城人萬曆乙未進士戊戌殿試
改庶吉士除編修歷官少保戶部尚書武英殿
大學士贈太傅謚文端有後樂堂集

七十自壽

黃龍枉自說三關白鶴何須鍊九還醉客豈真千日醉
閒人難到十分閒清溪水滿長搖艇紅雨春深一看山
時至便行無不可幾能塵世駐朱顏

周如磐 一首

如磐字聖培莆田人萬曆戊戌進士改庶吉士
歷官太子太保禮部尚書文淵閣大學士贈少
保謚文懿有澹志齋集

采菊

高秋凜風色百草遞萎黃嘉彼東籬英參差裛露光采
之不盈掬悠然傾我觴杖策寄事外仰視歸鳥翔會心
水木間獨坐以徜徉

熊廷弼 一首

廷弼字非伯江夏人萬曆戊戌進士除保定雜
官入爲工部主事擢浙江道御史巡按遼東提
學應天遷大理寺丞以兵部右侍郎右僉都御
史經略遼東駐山海關進尚書兵潰棄市傳首
九邊有性氣先生集

新卜東園

爲愛池塘好辟喧新開別業向東原梅山樹遶斜連谷
蓮渚橋通直到門傳是舊時花柳巷竭來漫作桔槔園
主人初領林泉事鎮日經營不憚煩

陳邦瞻 四首

邦瞻字德遠高安人萬曆戊戌進士除南京大理評事升工部員外轉郎中出爲浙江參政歷福建按察使河南左右布政使以右副都御史巡撫廣西以兵部右侍郎總督兩廣終吏部左侍郎有蓮華山房集

江南樂

鷓鴣南枝鳥愁從北鴈去儂家在江南但愛江南住

七夕

歲時還七夕風俗更杭州聞道湖船女爭歸乞巧樓輕雲籠月度疎樹帶星流不有乘槎客憑誰識女牛

久雨

久雨牆苔積濃陰苑樹遮席門寒下雀蒿徑曲藏蛇浦水連街門江潮帶閣斜誰憐都會地卑濕似長沙

辛丑之秋自留署乞假歸省沿途觸景輒成

水次兼山次昏星復曉星古城巢父廟仙迹呂公亭日落山光白雲流石氣青橫塘秋浪闊鷗鳥自冥冥

畢懋康一首

懋康字孟侯歙人萬曆戊戌進士除中書舍人擢廣西道御史歷官兵部右侍郎有管滄西清二集

束茅行

候人何太苦早晚迎官府閒積數根茅爲炊且結宇官

府中夜行不絕吏呼聲
燃火照官路猶云火不明
燃茅茅無束次第拆茅屋
官府猶未知宵征車輾輾

董應舉 二首

應舉字崇相閩縣人萬曆戊戌進士授廣州府教授升國子博士歷吏部郎中南京大理寺丞太常少卿太僕卿終工部右侍郎有董崇相集

雜作

小官事大官曲意逢其喜事親能若茲豈不成孝子

丙寅聞邊報

出山已分沙場死今日生還亦主恩
忽報遼陽飛騎近白頭垂泣向江門

徐良彥 一首

良彥字季良新建人萬曆戊戌進士知婺源溧水二縣擢河南道御史外轉福建參議轉山東按察副使入為尚寶司少卿歷大理寺丞右通政以右僉都御史巡撫宣府回籍起南大理卿

升南工部右侍郎

錢受之云公少讀經濟之書不事聲律而仲寫志意風骨冷然警句獨絕

詩話侍郎語多獨造其寒上曲云長城陳死人力皆如虎亦警策也

落葉

落葉不上枝因風亦復起清風本無私何因有彼此
一葉隨飄蕩一葉沾泥滓寄語風前葉莫墮東流水

洪瞻祖 一首

瞻祖字貽孫仁和人萬曆戊戌進士改庶吉士授兵科給事中謫知嘉定縣稍遷南行人司副累遷太僕卿以右都御史巡撫南贛有清遠山人漫豪

題李都督朝鮮圖

王者安天下終資不戰功金城圖略上青海戍樓空長笛關山月寒砧木葉風還將憂國淚添入錦題中

鄧漢 六首

漢字遠游建昌新城人萬曆戊戌進士除浦江知縣調秀水再調內黃徵授河南道御史巡按雲南升山東副使轉浙江右參政山東按察使

擢右僉都御史撫順天有留夷館南中紅泉諸

集

錢受之云遠游自序謂十歲喜誦唐人詩年十五始學詩生長寒素衣食多累三十成進士州縣為勞徵拜御史需次邸舍朝請多暇謝絕人徒悉取毛詩楚騷下逮三唐細閱而深思之神明默識霍然悟汗乃知我明諸公之學古人都在形骸之內去之所以更遠王李既廢流派各別狂瞽肆逐實繁有徒孝豐吳稼澄詞林老宿見楚人而大悅盡棄其學而學焉予厲聲訶禁乃止遠游當王李未流楚人崛起之會欲箴砥兩家之病而集其所長其志則大矣旋觀其詩體貌豐縟音節繁會長篇極意鋪陳而持擇未得其領要今體取材尖巧而剝搜未脫其皮毛可與掉鞅時流或未能方軌先正也

武定變

朝登武定城暮宿抵羅次有何龐眉叟遮車泣訴事問叟何所苦問叟何所覲叟耄復健忘憶一不記二往者萬曆初邊守幸康又守令咸得人民物鮮札厲伍伯不

到門什一有恒稅斛米纔十錢半鎰易一醉龜貝自轉
輸工價集駢坐相歡太平人但供角觝戲嗚呼廿載間
乾坤一幽閉中丞文且武抵掌談封拜羽檄豈虛來兵
革靡寧歲忍以百萬命而快一人意忍白千里地而希
茅土賜守臣本蝨賊中璫甚狂獠此輩紈袴子况彼糞
除隸咆哮而負嶠逢者鮮不噬不忍因民怨奈何虎冠
吏一夫敢倡難餘孽竟昌熾訛傳寇初集頗遭守者詈
龜勉授殘甲垂頭望睥睨蜂涌圍已合蟻薄城遂潰巷
戰力不敵免胄期殞碎烈烈金與王闔門竟死義宛轉
蛾眉女慷慨丈夫氣泣抱黃口兒牽挽及娣姒相繼付
烈燄義不汙賊鑽草間苟求活羞彼郡都尉難撲燎原
火易乘破竹勢中丞文且武小醜曾帶芥下令城中外
毋得輒引避按堵第如故已定退賊計賊來如風雨剝
膚患孔亟晨興牙門啓文武成就位寇賊在門庭請問
計安出中丞噤無語汗流手顫悸但云烏合衆不久自
當退城外鼓盈天城中哭震地賊徒皆重鎧踉蹌錯其
臂每聞得漢兒刃腹必洞刺刳腸絳樹枝烏鳶下爭食
尸積雲津橋血流滇海滯中丞非不武空拳安可試登
樓望賊徒懔然思所畏或用緩賊謀姑爲好語慰彼賊
若罔聞瞋目仍攘袂惡詬至不堪左右皆沮媿甘受城
下盟竊發虞姦細搗用十二牛文錦先皮幣葦紮織成
衣黃金鈎落帶銀印龜形鈕本自上方製名器敢輕假

曾謝挈餅智賊衆始拜舞觀者猶惴惴賊來荷戈入賊
去駝金回何對切可憐窈窕孌抑作犬羊配虜獲動無算男
婦必累騎輜重百里間縣縣行不絕此內切獯賊固驍悍小
勝輒忸怩餘制切中丞文且武開門悉精銳擊歸伺其急小
醜安足殪但聞攀牆看誰將一矢遺去聲夷民舊部落府
主新儀衛前歌後有舞送歸刺史解昭昭漢日月幾向
蠻天墜忍死幸須臾延頸王師至焚香拜馬首雙頰如
雨淚不意溝壑軀復覩漢旌幟感激活我恩人持一筥
餌長跼主帥前帥聞乃大諍怒聲吼如雷立命三軍士
居此圍城中盡與賊勾結吉詣切從賊有顯戮任其所斬刈
軍士擁向前兩手捽其髮方味切舉刀便欲斫觀者但睜眦

叩頭連乞命我輩有何罪爾輩實無罪是爾命盡日而至切
昨傳中丞令首開購級例重賞不踰時以此競趨利撻
賊無所得失利且有害頭顱許借我誰能別真偽老幼
聞此言號擗淚盈皆生既無門控死當訴上帝駢首就
鋒刃流血如泉沸次第列功狀報捷日三四中丞啓捷
書抵掌大稱快催軍益前進功多賞亦倍傳教諸將營
努力功名會今年殺諸賊金印如斗大當取懸肘後急
擊慎勿失武吏切天網恢恢布多殺神所忌逆賊既就俘將
吏亦被逮糜爛同一理誰逃百六阨烏懈切叟昔有三子諸
孫繞膝嬉酷經喪亂來竝無髻鬣嗣田園既蕪沒居室
遭焚燹親友凋殘盡生理迷所寄人皆羨高年高年有

顯顛歎息老叟語停鞍重獻欵去聲名變良有初妖象著
為篲町曠作戰場噫嘻豈偶值

閒居

敬通居里日彭澤去官辰酒熟邀田父花時對孺人素
琴橫竹几藜杖挂山中在世無明略猶堪傳隱淪

田家樂 二首

烟火高原合雞豚小市通夜行防虎阱寒至築牛宮捕
雀遵桑翳澆麻引竹筒今年倍收秫不怕甕頭空
挾彈驅田鼠持竿放野豚但令倉有粟寧使婦無禪賣
藥曾過市催祖少到門不知今去漢歷代幾兒孫

奉陪蘇中丞游招寶山同作次壁間韻

突兀如臨碣石倚天青島嶼辨微茫千年陰火疑潛熟
三足陽鳥本內翔魏闕遙瞻天北極戈船爭指日南王
臣心似水朝宗遠一任沮洳變作桑

春日述懷寄湯義仍四十韻

漢域春陰盡蒼山旅病淹梯航三面入風壤百夷兼五
尺通秦道單車即瘴炎投荒虛繡斧覽勝引丹幘市有
紅藤篾家珍白井鹽沔蹄規海闊峯崢露峰尖霜菡萏長
含潤溫泉側注瀝衣冠餘焚爨貨貝古閭閻茉莉簪花
豔稔杭釀酒甜緬文披似篆蠻語聽猶譚烽燧宵常警
萑蒲日戒嚴由來稱卉服未可廢戎鈐往者勞徵發王
師快殄殲傷心多戰哭無術救危阡退食聊閒步幽吟

却卷簾磔雞初學卜射隼竟空占牽拙身何補浮湛趣
自恬怪看顛種種轉益貌廉廉藥裏頻致命觚毫嬾欲
拈神龜寧要灼廢馬剩須箝自笑名為累誰知意所忤
以予嬰世網念子獨淵潛客坐閒垂釣妻鉏竝擁鎌游
魚窺硯沼微雨映書籤句琢文心巧時推筆力銛七襄
勞組織一字費鍼砭善戲非為虐雄文合愈疢木蘭舟
汎汎荷芰帶襜褕麗曲傳箏柱閒情詠鏡奩吟當花纂
纂舞愛玉摻摻多取天應忌高名已亦嫌餘生甘劓刑
抵死乞髡鉗老態杯中失窮愁病裏添澤糜安飲啄涸
鮒且喁噉世外論歡賞私衷早屬饜筌蹄自有契膠漆
乃非黏別怨稱殊未歸期歎不詹春心傷碧草秋望滿

蒼兼饑渴思瓊樹書題倚素縑空庭無過鴈竟夕坐明
蟾今古論冤憤乾坤幾顧瞻已而應謂鳳宛彼一鳴鸛
種竹籓官舍看雲到步檐池萍青靡靡砌卉綠纖纖戀
關心徒奮傷時口合鉗風塵途漸迮原野氣猶燼輦轂
憂胡越深宮歎釜鬻迷津憐弱喪回策庶西崦瘴海愁
空說鄉園淚暗沾思君遙送目烟雨晦巴黔

毛 堪 一首

堪字公輿吳縣人萬曆戊戌進士除吉安推官
選授廣東道御史升大理寺丞歷官南京通政
使卒贈工部右侍郎

蘭津謁武侯祠

羅岷山勢接哀牢丞相曾經駐節旄尚有里巫鳴社鼓
依然陣石出江槽偏安西蜀非初願深入南方豈憚勞
精爽不隨炎漢盡蘭津終古薦溪毛

何棟如一首

棟如字子極無錫人萬曆戊戌進士除襄陽府
推官以阻礦被逮起南兵部主事升太僕少卿
監山海軍有南音攝園二集

午日秦淮雜詠

深潭日落停舟滿高柳橋迴夾岸齊燈影不分波下上
人聲莫辨水東西

范鳳翼二首

鳳翼字異羽南直隸通州人萬曆戊戌進士除
灤州知州屢遷吏部郎中天啓初歷尚寶少卿
以朋黨落職崇禎初起復尋遷光祿少卿有勳

卿集

鄭玄岳云公在吏部以用賢遠姦為己任有一君子必亟進之
如顧端文高忠憲是也有一小人必亟退之如楊檟杜縻牛惟
曜是也其見善如渴見不善如讎而忌者至矣以八年里居之官而里
拾遺之疏以十七年不入都門之人而奉削奪之旨公獨處之怡然所
謂德音不
瑕者與

水閣

涼颼動水閣卷幔坐能幽竹嶼連朝雨荷池三伏秋茶
聲入高枕花氣上層樓鎮日無人到凭欄數白鷗

夏日李後岡先生五柳園讌集

三徑何幽勝居然陶令家涼風鳴豆葉疎雨落桐花虛

院疑秋早深林信日斜最憐塵事隔心賞足烟霞

秋日渡江

瓜渚輕舸破浪風金焦山麓亂流中秋高不避波濤險
欲看江南柿葉紅

鄧雲霄 一首

雲霄字玄度東莞人萬曆戊戌進士除長洲知
縣徵授南京戶科給事中升湖廣僉事歷四川
右參政湖廣左參議降陝西僉事調廣西升右
參政有百花洲集

隄上行

萬井樓臺落鏡中環隄處處小橋通吳娃慣蕩蓮舟劇

水淺沙明不畏風

吳文企 四首

文企字季駒號白雪南京旗手衛籍景陵人萬
曆戊戌進士除戶部主事歷郎中出知寧波湖
州二府終陝西按察副使有絮菴慙錄

詩話白雪廉吏守湖州時饜薪不給課僮僕刈後園豐草折枯樹以炊
拾得石一片上有玉筍二字其旁題識已滿乃宋元豐間物笑曰太守
落落如此石石應太守將去及遷秋載之以歸置香雨
樓聞至今尚在也其菴蘆集在湖所著詩頗饒清韻

題資福寺同寮友作

行到寺邊寺坐看山外山講堂分戶牖野席對溪灣暗
水香廚引高雲絕頂還茶瓜深話久欲起更牽攀
登定海八面樓望海

便欲乘潮去登臨小白華憑誰辨灰劫無術算河沙開
士元居海仙姑舊姓麻蓬萊幾清淺好問蔡經家

汎舟碧浪湖 二首

紺塔高懸山寺蘭舟不遠人家載出邨莊兒女折來楊
柳桃花

小櫂白蘋洲渡輕帆碧浪湖風歸到郡城春望湖山盡
在樓中

沈孝徵 一首

孝徵字公廉海鹽人萬曆戊戌進士除工部主
事歷郎中出為河南按察副使有玄暢閣集 顧太

初云公廉諸體未嘗不
師古人而惟陳言務去

陪祀長陵

憶昔攀龍向鼎湖幾回清夜聽啼鳥南來風雨羣山合
北望關河落照孤累葉衣冠瞻祖廟中宵綵仗發清都
霜華滿地松楸冷英爽于今陟降無

高出 八首

出字孩之萊陽人萬曆戊戌進士知曲周高陽
盧氏三縣升南京戶部主事歷郎中出為蘇松
參議遷副使轉河南參政升按察使降廣寧道
監軍副使改西平堡監軍有盧隱郎潛二集 馮元

成云孩之詩能不襲陳言 焦弱侯云孩之因
故為新去俗從雅譬之朗玉孤桐自中天律
詩話孩之家本東萊不襲歷下遺派如蘋婆果
初生食之味雖近醉猶勝冬月儲藏軟同縣絮

古意

鳳鳥久不至丹穴邈難尋如其今來儀不異他山禽所以鳴岐後千古閱其音

箕山

箕山於太室如岱有梁甫輔嶽竝稱尊他山遑敢侮願水源更清石流歷可數所以讓王人洗耳臨其澗一瓢棄陶唐飲牛媿巢父後代鮮若儔高風激千古

野憤

三十六年秋高子居于號再覩燕辭壘感我留滯客葉墜洛水清虎鬪熊耳夕時物惕所懷山川察今昔差我入雲雪八月中天白牛羊懸蒼崖橫術帶阡陌其人或

巢穴其俗無蓄積催科更復拙課殿甘督責十載曉吏事無能效涓滴折腰如尺蠖妻妾交不憚空谷幸無人時縱尋山屐庶少填委煩且免多口譴四海今小康天威儼咫尺恭聞聖節前臺省員滿百意氣富指陳容易輸肝膈封事報寢多往往生彈射元氣存碩果剝廬獨安適夫誰作厲階至今餘毒螫天聽愈以高噐訟竟何益黨禍歷殷鑒賢者宜自惜紛爭羣小利危言徒嗚嘖虺蜮與鬼狐影響襲其迹國事視勝負秦越比肥瘠君子處嫌疑虛名中一擲乾坤氣日短萬姓生理窄發緯誠過慮不敢不跼躄巍巍太祖功百世可憑藉天子堯舜資式瞻四門闢恭己治無為洛蜀得水釋小邑物亦

明詩紀卷五十八
遂豁此窮愁癖

洛中感秋

紅樹邛山路西風颯已驚東京有遺事游客不勝情金
谷銅駝地周公名伯城二毛動秋興三十豈成名

亭山園次道岸韻

野色臨高閣天風落綺筵屏寒松柏雨杯淨薜蘿烟細
逕分籬斷春畦抱井圓囂塵憐市眼應接轉茫然

荅贈劉載甫比部言別

五月江流漲家人苦鬱蒸把君贈佳句忽似踏層冰為
別亦常事忘情終不能漸深交態後知己感偏增

自德州買舟北上紀見

茫茫四野水水鳥掠風帆土屋無人閉江艘有使監新
魚隨罩得遺穗進桴芟出涕憂無象涼飈拂露衫

允修山林還作此奉問

西山積翠抱長安銀海瓊泉勢鬱盤千樹春雲靈寢覆
萬年仙月侍臣看旌旗羣帝迴鑿合風雨諸陵委珮寒
司馬相如消渴甚欲因多病乞祠官

何慶元 二首

慶元字長人六安州人萬曆戊戌進士授工部
主事歷郎中出為雲南按察副使有蘧來室存

橐

新浴夜坐

殘暑渾無賴
炎炎赤日懸
裸宜新浴
後涼愛晚風
前團扇蒲葵
歇方牀
莞弱便明河
想清淺烏鵲
易教填

雨霽

積雨晨初霽
歸心客轉多
薄雲天縹緲
深淖馬如何
秋水發新漲
孤帆揚遠波
柴扉休更掩
或者麴車過

黃汝亨

一首

汝亨字貞父
仁和人萬曆
戊戌進士授
進賢知縣升
南京工部主
事歷禮部郎
中出為江西
提學僉事轉
參議有寓庸
集

西山

悠悠逆旅間
忽忽意不展
振策西掖門
佇覽西山巘
北風紛車塵
曉日出林岵
遵塗泛洲渚
披草踐平行
水清既近矚
峰遠亦流緬
故術尋嶮嶮
新蹊遞深淺
靈巖恣冥搜
秋容歷餘眄
營魄境互託
貴賤理無選
微尚儻有愜
非譽自茲遣

張履正

三首

履正字我先
山陰人萬曆
戊戌進士除
應天府學教
授歷遷戶部
郎中出知廣
信府有吾兼
堂漪漪館二
臺

送張二府擢太平守

南粵羈縻地
旌旄漢守行
解維春浪闊
到日夏雲生
風掃蠻天瘴
威傳遠徼名
聖君應有意
賴爾作長城

送別夏京兆

如何夏京兆宦况獨蕭然雞肋君寧戀羊腸我自憐烟
花洞庭路風雨石城船分手從茲地相逢何處天

送堵師甫方伯之任嶺南限韻

熊車曉發建朱幢帝簡名賢任大邦南海諸侯推最長
中朝國士本無雙風清合浦明珠返雨過炎洲瘴癘降
相送一尊須盡醉明朝回首隔滄江

阮自華一首

自華字堅之懷寧人萬曆戊戌進士除福州府
推官歷遷戶部郎中出知慶陽府再補邵武罷
歸有霧靈集

詩話堅之跌宕縱飲為理官扶醉入謁巡按方下拜酒污御史衫袖遂
挂彈章晚為郡守不視吏事惟與賓客分簡賦詩遨遊山水而已嘗大
會詞客於凌霄臺推屠長卿為祭酒絲管交作列炬熏人復為巡按所
糾庶幾狂簡之士乎詩不求工君子誦詩論世寧舍詠懷堂而取霧靈
集也

歸路

歸路數千里斜陽咫尺間角聲斷城堞離恨起鄉關宿
鳥先人入江流背客還月中聽砧杵游子復何顏

曹徵庸四首

徵庸字遠生一字平子平湖人萬曆戊戌進士
辛丑殿試由延安推官入為大理評事選刑部
主事歷員外郎中終汾州知府有冰雪軒詩集

沈客子云遠生詩蒼
涼曠達多出塵之想

詩話汾州詩品超逸誦之
如食哀黎脆費大是爽人

黃岡道中

芳草展柔綠十里冒長堤
藤花覆高岡下與垂楊齊
穀雨春欲盡雙禽互悲啼
行子感于役思歸息山谿
閒看理綸繩坐釣桃花西
及春事偶耕烟蓑引鉏犁
斗酒勞作苦壺觴恣提攜
何為深泥中沒此青驄蹄

秋興

愁來白苧一停歌老去青霜兩鬢過
黯黯夕陽高鳥沒蕭蕭秋柳暮蟬多
冠軍出塞嗟何及前箸籌邊定若何
昨夜城南橫索馬傳呼客騎渡黃河

和秋柳詩

長信宮前幾樹彫風吹灞岸更蕭蕭
空勞好夢三千里無那輕霜十萬條
青眼乍迷魂黯黯蒼烟忽暗路迢迢
却憐二月春寒淺占斷東風紅板橋

南康官舍

偶住江城池上亭長松苦竹伴餘清
牆西秋色斜陽外截得廬山一角明

陳允升

二首

允升字雲達烏程人萬曆戊戌進士
滁州知州有燃藜閣遺藁

秋日苦雨

秋水漸浮隄青禾白鷺棲
祝簷空有意抱甕已無畦
蛩

明詩綜卷五十八
欲依人訴鳩偏逐婦啼不堪翹首望天際濕雲低

碧浪湖

城外烟波浸碧天城頭烟火萬家連中流塔影浮寒玉
隔岸風光入画船一片松雲歸獨鶴千秋俎豆列三賢
由來問俗多淳樸不似西湖競管絃

劉世教

一首

世教字少彞海鹽人萬曆庚子舉人官廣乘知
縣有研寶齋藁

古意

高樓有思婦光采瓊樹枝陸離雙玉佩明珠綴巾綦
摻出手爪哀哀寫芳辭清商未終曲聽者淚已滋良人
無故權前妾無前期空憐夜夜月流影過重栢

王嗣奭

二首

嗣奭字右仲鄞縣人萬曆庚子舉人有密娛齋
集

九日聞范君材補官戲簡

龍山吹帽日北闕賜環新好飲黃花酒休令笑逐臣

舟中即事

黃河杳無際白浪卷山回不待窮源去方知天上來

明詩綜卷五十八

明詩綜卷五十九

小長蘆 朱彝尊 錄

西谿 高興 緝評

張以誠 一首

以誠字君一松江華亭人萬曆辛丑賜進士第
一授翰林修撰升右中允終右諭德有酌春堂
集

贈蕭大將軍移鎮漁陽

鳴沙城北接雲中千里飛狐一道通
十萬健兒齊上馬
旌旗獵獵動秋風

王衡 六首

衡字辰玉太倉州人萬曆辛丑賜進士第二授

翰林編修有緱山集

高孩之云辰玉詩清
新踔越卒歸諸雅

靜志居詩話緱山才氣無前而韶年相酬和者不過陳仲醇一流臨終
自訟曰吾於詩窺其藩未造其域可謂得失寸心知矣惜也未盡其蘊

雨中徐州道上

鄉山看在眼愁向暮山生驛舍清明雨人烟芒碭城花
飛急流盡雲起大河平一路茫茫白歸心亂旅程

十月

此日田功晏未誅冬月茅雨收紅豆莢霜老木棉苞地
薄秋畦苦官新雜稅交君看窮鳥至歲暮亦登庖

十月十五日冊封分藩

琅函五色下芝宮十月陽春驛樹紅夜半日輪重海上

天邊星影照江東老臣涕淚謳歌裏游子衣冠拜舞中
檢點退思真過計當年園綺幸無功

穀城

出山逢老人入山化黃石千載石人前紛紛拜行客

支硎即事

夜來月暈半無光今日風來不可當我勸游人且歸去
百花如雨下山塘

錢江浪淘沙

聞道山陰雪半消北連湖水下桐橋桃花浪起衝沙破
恰好東風上白鱖

鄭以偉 二首

以偉字子夫上饒人萬曆辛丑進士改庶吉士授翰林簡討歷左贊善右諭德左庶子少詹事升禮部右侍郎進尚書兼東閣大學士加太子少保有沅泥集

徵兵

羽書諸道召勤王羅幕營前送啓行隆萬邊兵恒十萬薊門但付戚南塘

霜降疏請謁德陵

萬壑哀湍霜葉丹橋山劔烏碧天寒被恩殿下千行淚白髮當年舊講官

熊明遇

一首

明遇字子良進賢人萬曆辛丑進士除長興知縣徵授禮部主事擢兵科給事中出為福建僉事轉陝西參議召為尚寶少卿轉太僕少卿升右僉都御史兵部左侍郎拜南京刑部尚書改兵部尚書有綠雪樓集

釣舟

竹竿溪上釣魚舟洞口桃花信水流曉月半輪新雨霽春山缺處是嚴州

蔡毅中

一首

毅中字弘甫光山人萬曆辛丑進士改庶吉士授翰林簡討降麻城縣丞升行人司副遷尚寶

司丞降長蘆鹽運司判官再入為行人司副改
國子司業進祭酒升禮部右侍郎兼侍讀學士

秋興

木落江空天氣清西風蕭颯雁南征浮雲暗逐年華變
岐路虛憐短鬢生千里關河懸客夢萬家砧杵動秋聲
崇蘭芳芷依然在何處江潭弔屈平

公 鼎 二十四首

編修歷少詹事禮部右侍郎謚文介有問次齋

稟

焦弱侯云先生詩發于情嗚于旨極變窮工斟酌中和率歸大雅
趙季卿云先生詩博大宏敞無湫隘之態 李季重云成弘以
來李何登壇狎執牛耳談藝者輒謂文章之權不在館閣然如劉伯溫
之警策宋景濂之溫純解大紳之豪爽李賓之之浩瀚王濟之之簡潔

曾子啓王敬夫之高邁高季迪之超脫崔仲昂之修潔丘仲深之博雅
楊用修之奇崛王允寧之簡練康德涵之雄俊廖道南之富有於館閣
中皆稱獨詣其言不盡非亦不盡是也先生諸體咸妙不屑屑摹古亦
不沾沾是今極風雅之用晚年山居諸什尤得真趣 王貽上云文介
詩文淹雅不減唐人風致絕句尤工 李
渭清云則次齋詩篇篇溫栗句句清脫

詩話言詩於萬曆則三齊之彥吾必以公文介為巨擘焉即其論詩大
指云風雅之後有樂府如唐詩之後有詞曲聲聽之變有所必趨情詞
之遷有所必至古樂之不可復久矣後人之不能漢魏猶漢魏之不能
風雅勢使然也如漢朱鷺翁離之作魏晉諸臣擬之以鳴其一代之事
易名別調當極其長豈以古今同異為病哉後世文士如李太白則沿
其目而革其詞杜子美白樂天之倫則創為意而不襲其目皆卓然作
者後世有述焉近乃有擬古樂府者遂嗣以擬名其說但取漢魏所傳
之詞句模而字合之中間豈無陶陰之誤夏五之脫悉所不較或假借
以附益或因文而增損踟躕牀屋之下探賸膝篋之間乃藝林之根蠹
學人之路阱矣以此語於作者之門不亦忍乎夫才有長短學有通塞
取古今之人一一強同則千里之謬不容秋毫肖貌之形難為覲面若
曰樂府則樂府矣盡人而能為樂府也若曰必此為古樂府使與古人
同曹而竝奏之其何以自容哉李于鱗曰擬議以成其變化意擬議將
以變化也不能變化而擬議奚取焉又云律詩出於古詩而難於古詩
七言後於五言而難於五言故七律於諸體中最不易工古今長技惟
杜氏耳杜氏之長則秋興懷古諸將數篇而已近世擬作甚多大率淺

率牽合觀者厭焉又贈邢子愿長歌云為君歷代選宗工前稱弘正後
嘉隆北地雄渾真大雅步趨盡出少陵下汝南俊逸誠天然邊幅姿態
未全捐濟南匠心奇且麗藻績無乃傷辭意武昌才美謝諸君節制之
評獨出羣東吳囊括靡不有利鈍未能免人口大抵明興只數家瑜者
從來不掩瑕餘子紛紛未易說擬議原非吾所悅丈夫樹立自有真何
為效彼西家顰蓋力攻摹擬之非然觀其七律仍以歷下為宗故有文
章一代李滄溟之句同時名家者馮
用韞于念東王季木皆拔萃者也

唐蒙有絲

唐蒙有絲不可以縫戴星有穀不可以舂天有匏瓜其
誰食之海有昆布其誰衣之飛鳥依人不可與語嘉樹
蔽身不可與處鶴飛于天其鳴在陰魚沉于淵其潛在
深

客從遠方來

客從遠方來貽我雙文禽置之巾箱中寶惜如兼金朝

夕供飲啄顆粒比瓊琳羽翼日以長翻飛歸遠林去不
歸故棲來不懷好音聚散自恒理眷戀傷子心積羽投
洪波誰能定浮沉臨崖激翻車誰能論高深

詠古 二首

齊糾亡公子乃有從死臣田橫士五百臨難皆隕身西
京萬億眾符命爭美新古來稱得士惟在意氣真推心
置人腹豚魚亦相親

古人獲我心善達窮通理安危慮所居屈伸貴自己已
貴可復賤中立常不倚衰至易生驕腊毒恒在美薛公
僅遺榮疏傳庶知止寥廓晞冥鴻矰繳安可擬

歸田雜詠 三首

導汶自艾山南流達新甫東蒙配岱宗其首挈鄒魯一
山一水間幽勝略可數薄營本荒陬芟除闢宿莽雙溪
作襟帶連岡若環堵結屋八九間開徑數十武歆仄植
亭棧夷曠築場圃畚鍤連朝昏胼胝易寒暑但求靜者
便不厭作者苦

避地恐不深吾必在汶上曠野多平疇游目足自廣南
岡一握中林麓稍森爽石壁拓精舍石門斲新壤陽崖
連陰峰遨遊愜心賞呼兒荷鋤鋤攜儷治績紡旣欣禾
豆登復見桑麻長八口可無飢亦足代祿養豈足規達
人庶幾屏塵想

遠遊得暫歸機事久方釋漸與朝市遠轉戀林野寂田
疇日以親風雨頗相習農人告及春欣然顧襁褓負杖
桑陰午荷鋤麥隴夕遶屋榆烟暝隔水梨花白遠目任
縱橫安步隨偃息一區安蓬蒿一盂飽橡栗溪山本不
廉琴酒堪自適

擬杜遣興

人苦不知足有願何終極當其入天門猶未厭羽翼一
朝成蹭蹬唾井無復惜昔日李將軍灞亭人不識

秋夜

河之水清泠泠漾月色明空庭對牛女此夜情願爲乾
鵲飛青冥相思宛轉何時平

濟河道中

汶水南通楚清河北帶齊故山雲淦淦長路草萋萋野
曠秋天闊峯高夕日低前村疑漸近轉盼暝烟迷

穆陵關

昔日齊侯履南疆盡此封諸山沂作鎮五岳岱為宗沂山亦名東大山
霸國猶餘業重關識舊蹤故園相去近回首海雲重

棲霞邠都宮丘長春成道處

乘槎涉弱水陟降迄仙都石室誰開闢丹臺跡有無十
洲為近地五岳識真圖坐聽鸞笙晚勞峰天外孤

南竺感舊

鐘磬重巖裏楸梧亂石間水窮仍見水山近却無山感
慨因懷舊淹留為愛閒自嗟塵網繫雖倦不知還

過蒙陰舊城山家留飲

故堞依山麓相傳漢舊城桑麻千畝遍梧竹一邨平客
醉遲歸意來希重別情出門逢野老重與話躬耕

辛丑得第赴館年逾仕矣

釋褐明經暮操觚祕館嚴因知進士少唐諺五十少進士
夫潛慣見蒼龍礎通典舉人獻充庭詩仍攀翠羽簾洞冥記漢武帝招賢閣以

翠羽為簾儼然諸俊後白髮幾莖添

梁臺遇雨

不見梁臺月孤亭暮雨昏感時思艮嶽懷古問夷門苑
竹龍鍾發宮槐兔目存星軫疎應接白鳥對開尊

諸將

上谷漁陽拱帝京相連河外受降城一從塞馬來南牧
遂使王師罷北征絕徼尚傳青海箭中原新動綠林兵
主憂正值宵衣日誰向天山荅太平

過漢高祖廟

豐南松柏晚蒼蒼漢祖遺宮古道傷父老祇今餘涕淚
風雲依舊各飛揚一杯事業歸陵土萬歲神靈在故鄉
却憶炎精銷歇後千秋王氣屬吾王

習家池

峴首宮堯漢水長習家烟樹野亭荒羊公流涕山公醉
竝枕殘碑卧夕陽

西郊金主釣臺

花石遺京陷戰圖薊門衰草釣臺孤不知艮岳宮前叟
得見南兵入蔡無

畿南問宋遼戰地

戰勝河東下薊丘高梁失御陣雲愁六飛不入燕山府
直見鑾輿到廣州

明湖獨眺

窄岸平橋萬柳斜半城春水半人家東風吹雨宵來急
一片鄉心到海涯

南樓

十二樓開列玉京分明天上落層城檐前寂寂三珠樹

明言總卷五十九
六
半夜鶴飛枝上鳴

掖縣道中

齊疆行盡海雲生處處看山自問名
麥秀漸漸桑柘綠
馬頭不見曲侯城

董光宏

二首

光宏字君謨鄆縣人萬曆辛丑進士除刑部主
事歷員外郎中出為河南提學僉事轉參議副
使參政遷陝西按察使江西右布政入為順天
府尹升南大理卿致仕加南兵部右侍郎有秋
水閣集

補陀

東南澤國半往往饒異蹟大海峙補陀懸崖幾千尺層
波山震撼斷榭石蒼赤明滅九點烟超忽萬里舶翻風
鷺鳥退近岸亂帆擲西方有聖人東海乃其宅年來詔
使至旛幢颭巖石我亦飛渡來流覽感今昔摩挲蒼蘂
花四望曉天白

許昌道中

青郊小雨裊游塵正是芳菲一半春花柳故園應共笑
主人歲歲作行人

許

獬

一首

獬字子遜同安人萬曆辛丑會試第一賜進士
出身改庶吉士授編修有許鍾斗集

孟夏陪祀太廟仿顏延之郊祀歌

皇祖於昭賓於帝里照臨萬方匪遠伊邇享祀苾芬陟
降來止其祀維何大輅玉几穆穆皇皇百辟卿士其德
馨香升聞不已皇祖居歆醉飽具起孝孫有顯報以繁
祉自今伊始

雷思霈 一首

思霈字何思夷陵州人萬曆辛丑進士改庶吉
士授簡討有歲星堂集

北郊鷹房作

遼城金壘古鷹房羊角風沙接大荒野窟舊無狐兔蹟
小池今有芰荷香黃鸝獨語遮深柳粉蝶叢飛戀短牆

千古幽州還禹甸卜年開統憶先皇

袁懋謙 五首

懋謙字吉卿豐城人萬曆辛丑進士改庶吉士
授兵科給事中有虎溪詩選

擬古 二首

行者日以行思者日以思日月相代謝荏苒踰歲時君
子在萬里獨宿誰與怡徘徊增感傷託夢通音徽音徽
不可接涕泣沾牀帷披衣還起立東西迷所之
熠熠花間螢照我庭東廂高飛不能起歛羽舒其芒云
是腐草化耀此玄夜長逢時被渥澤朽質自生光

山中晚歸

晨出後鳴雞夕歸先倦馬山烟已染衣望之在平野霞
光逐日散暝色浮空下追羣獨鳥飛韻壑奔流瀉事去
無中戀情來非外假入門誰為娛邨釀聊可把

同年郭太素從廣陵攜姬人為白下之游賦別

白門花月可憐宵宛轉朱欄映画橋怪得彩雲飛不散
玉人新度廣陵簫

東封日本歌

司馬頻年苦運籌東封擬解廟堂憂如今却似商人婦
愁水愁風望去舟

詩話此嘲東明不
尚書拱辰作也

茅瑞徵

瑞徵字伯符歸安人萬曆辛丑進士除知泗水
縣調黃岡擢兵部主事歷郎中終南京光祿寺
卿贈大理寺卿有澹樸齋集

詩話大理鹿門從孫家世饒松鹿門孜孜治生大理耽情吟詠歷官有
廉吏之目壯年即解組歸田自敘云炙手不知炎下石不知險脂膏不
知潤軒冕不知榮胸無機械意無好醜殆天下之至愚人也因自
號芒上愚公官職方時著有象胥錄三大征考詩亦真率自喜

彭城懷古

望彭城彭城面面水環匝與城平君不見馬中赤兔人
中布引水灌城走無路

送薛駕部還陝

朔風日以厲肅軫超西秦行行歸故鄉而我失所親與
君同舍郎况乃託比鄰相望朝伊夕綢繆亦有因一旦

出門辭飛飛關陝塵仰盼浮雲駛悵然憶遠人懸知經
歲別分手自愴神願展平生意河梁寫其真聊將盈尊
醪敘此離情新我亦賦歸來離合難具陳

俞 彥 十首

彥字仲茅太倉州人萬曆辛丑進士除兵部主
事歷員外郎升光祿少卿有擬古樂府

詩話少卿擬樂府自南北朝入亦是解人第篇幅稍長
輒未合古此韓退之所云不造其堂不躋其蔽者也

企喻歌

新降吐谷渾齊唱部落稽嗒汝勿復驕來聽企喻辭

琅琊王歌 二首

金陵山四圍都城帝王住江水從西來淮水東南注

北面望琅琊可憐盡空闊鹿挺走他山復藉豐草活

淳于王歌

鬱鬱田中禾禾熟自成穗沉沉合歡帳獨寢不成寐

讀曲歌

與歡橋頭別楊柳纔垂絲空局不著子尋思未有棊

雍州曲

可憐南雍州形勝山四抱南湖與北渚都上大堤道

作蠶絲

蠶老變作蛹吐絲外成繭但見外綢繆中心無由見

自君之出矣

自君之出矣心怒如調飢思君如貪吏無有饜飽時

折楊柳

二月江水平春洲春樹生垂楊復垂柳
新雨更新晴蕩子年年別東風歲歲晴

捉搦歌

兩馬異力問輿騶兩絲異色問離婁
兩狐異革問司裘兩人異處問蹇脩

孫光裕 一首

光裕字子長嘉興人萬曆辛丑進士除建昌知縣補固始擢山西道御史升南光祿少卿有廉

善堂集

酌酒與韓求仲

君不見塞上翁失馬不足憂得馬不足喜禍邪福邪迭
相倚世事大都皆若此邯鄲婦嫁廝養兒宿瘤身入齊
宮裏紛紛好醜難具陳好醜由天不在人大夢之中還
說夢浮漚聚散護屈伸百年能得幾時樂十九憂愁病
與貧吁嗟乎侏儒飽欲死東方饑欲死才人坎壈自昔
然落落寧惟吾與子且須飲酒醉莫辭人生亦貴適意
耳

趙士諤 二首

士諤字審卿吳江人萬曆辛丑進士除會稽知縣入為職方主事調考功司歷文選郎中遷太僕少卿以僉都御史巡撫宣府有中丞詩選

送周蓼洲吏部

久繫中朝望嘉招慰物情不誇津地重獨喜市門清是
處成蹊徑憑誰秉國成渙羣今日事行矣慎持衡

來季方還蕭山

彷彿經過三十秋年年盼望越來舟幾番夜雨曾聯榻
何處春山不共游往事茫茫渾是夢故人落落總堪愁
老來轉覺難離別欲去還期十日留

蔡善繼

一首

善繼字伯達烏程人萬曆辛丑進士除莆田知
縣調香山入為工部主事歷郎中改兵部出知
泉州府歷湖廣福建左右布政使有去去齋集

春日閒居

幽棲未擬絕塵寰楚帝橋西水一灣樹裏暗浮鄰寺塔
樓頭青入傷城山不緣好客寧沽酒祇為高僧遂出關
春鳥自鳴花自舞禪心竟日與雲閒

譚昌言

一首

昌言字聖俞嘉興人萬曆甲午鄉試第一辛丑
進士知嘗熟婺源樂城三縣遷南兵部主事歷
員外郎中升福建參議提學轉山東按察副使
以參政卒于官贈太僕寺卿有狷石居遺集

詩話譚公宰嘗熟識瞿起田於諸生中移婺源盡鐫徽國文公遺書儲
之高閣課士子誦習迨視學于闕杜絕請託試卷不假一人寓目皆手
自甄綜案未發公子來省觀寄食旅店中不許入解嘗自謂此官可棄
此案不可移蓋視學三年而鬚髮盡白矣分守東萊有濰令與遼將相

構遂以遼兵叛聞巡撫初蒞倉皇入奏檄發兵會勦登營多遼人偶語籍籍公大言曰遼將吾將遼民吾民誰敢言發兵者入營探遼鎮李泮忠手令馳箭諭維管將士皆感泣毛帥在烏門舉朝交倚為重公獨以東江進兵為厲局曰此登寇爾公以積勞嘔血死思陵即阼卹以死勤事諸臣特贈公太僕卿公在留都結詩社讀史社詩愛孟襄陽第不多作

贈吳興蔡叟

先生無俗侶野鶴與同羣奕對包山橘書開石室芸白蘋雙槩渡紅葉五亭分高隱看誰似將無鄭巨君

徐禎稷 三首

禎稷字叔開松江華亭人萬曆辛丑進士除刑部主事歷員外郎中出知夔州府遷按察副使致仕起補浙江温處道以病引歸有餘齋集

詩話叔開清門廉史比於胡威父子其在夔府寄書家中附詩云寄語機雲山下水出山仍似在山清蓋入蜀之後詩尤深婉句如千盤白鶴

雲中路三暮黃牛峽口船卧閣秋雲生白帝登臺春雪和巴人雲邊古堞三千雉花裏春城十萬家水白瞿塘聞榜柁雨晴赤甲見棗麻入春江勢疑吞郭一雨山光盡到樓天未鴈稀秋色盡山家橋熟夜霜清新猿雨後瞿塘路獨鴈風前故國心俱滿灑出塵

獨木橋 悲熊芝岡也

獨木橋林下渡蔓草徑山前路杖藜躡屐閒來去不怕秋風與秋雨君不見六州都督三軍將棘門馬道廣十丈飛虎風開赤羽旗盤龍日灼紅絲鞅世塗自合有翻覆蒼茫眼底生陵谷北闕霜催壯士心西郊雨暗孤臣哭噫嘻東門黃犬不肯牽赤血要灑咸陽阡

澱湖

雪浪堆三泖風帆挂澱湖斷雲收雨淨高樹入秋孤暮色諸峰碧寒聲一鴈呼滄浪歌罷去漁父定吾徒

浦口望金陵

千金紫陌駐遊驂
繡閣銀燈酒半酣
十四年來魂夢斷
今朝江北望江南

張鼎八首

鼎字世調松江華亭人萬曆甲辰進士改庶吉士授簡討歷國子監司業諭德庶子少詹事升禮部右侍郎加太子賓客落職起南吏部右侍郎掌詹事府事有寶日堂集

南山猛虎行

并序

景州道上官餉四千二百暴客十六人白晝被劫作南山猛虎行

南山虎北山盜行路難三河道三河健兒氣縱橫彎弧躍馬矢鏑鳴征車麟麟出官路官錢私錢走如鴛官錢押解濟遼軍私錢興販資商賈河東一路村無烟枯楊荒草六月天車夫汗喘車輪折百里五十行不前霹靂一聲呼廣漠壯夫墮馬魂膽落止求買命不求錢官錢破積私傾橐何圖遼餉四千餘景州白日供搜攫刺史傾家上已空地地方捕盜捕虎同

援兵謠

老翁卧牀覆牛衣老嫗當牕續繭絲小兒竈上戛釜糜縻薄不克兒腹饑驚聞一聲叩門急彎弓帶箭橫闖入小兒哭走牀下匿曳翁下牀相煎逼驅嫗取火急烹煮

東鄰買酒西鄰黍東西兩家各受兵一粒一滴不肯予
老翁老嫗跪痛哭今日腹中昨日粥賣衣典袴止百錢
獻與長官來折乾長官出門氣如虎走往前街尋大戶
前街大戶緊閉門以石敲破翻怒嗔直入卧內據牀裯
妻女含羞各奔竄竈前火滅人影斷纔供醉飽一隊過
後隊又到須徵辦

登醫巫閭山絕頂挾一老僧以從放歌

神州五岳神所居遼西乃有醫巫閭長城不能斷地脈
靈氣盤結東扶餘翠屏萬疊遮大漠危峰千尺凌清虛
砂頭西犇似駭浪山勢北曳同衣袂石壁巉巖俯絕壑
泉流滴滴下深渠鼉岡魄礪苦折屐烏道盤屈驚催車
逶迤百折山之半別開一洞棲猿狙山漢突兀鑿新磴
佛火荒涼依舊盧攀厓披棘上絕頂天風欲墮吹襟裾
何當一掃狼烟息山巔可勒燕然書

送茂倩姪官南水部歸省

悲哉是秋氣黯爾別銷魂九月黃花節三家白酒邨砧
鳴驛夢曉笳動戰塵昏行矣東方騎高堂正倚門

清音閣同平仲夜話

平子吾宗望相逢此地遊湖山同是客雲物已先秋北
嶺看松路西溪聽雨舟眼中惟爾我沉醉坐江頭

過大名舊城

日落征途訪故宮行人指點舊天雄女牆斷續牛羊下

墟墓高低禾黍中漳水不堪添夜雨澶碑依舊立秋風
古來河北關興廢一說干戈恨未窮

唐中翰袁抑辭講筵出佐浙齏戲贈鹽字韻一律
并懷其二仲中甫熙甫

青案翻經職典籤亭亭玉樹謝家簷前籌借箸海為賦
舊學調梅羹作鹽篋筆長騰池上彩賜衣猶翦尚方鎌
斷橋鴈影孤山月幾度懷人試卷簾

樓居春暮

春事初殘雨一犁豆苗瓜蔓長春畦客來烹茗供新水
興到銜杯續舊題剩有圖書翻枕上總無亭館近灤西
小樓日出朝眠穩為語流鶯莫亂啼

傅淑訓

一首

淑訓字啓味孝感人萬曆甲辰進士濬知濮州
調澤州入為工部員外進郎中出知平陽府升
山西按察副使尋提督學政歷陝西參政四川
按察使遷太常少卿累遷戶部尚書

題香積寺

平甸草鋪似繡高峰石削如門牛羊十里五里雞犬
邨後邨

趙彥復

一首

彥復字微生杞縣人萬曆甲辰進士官至湖廣
按察副使有趙微生詩選

汪明生云微生古詩有河梁之
遺響下亦不失寶曆流風近體

詞以興成格由骨振
寧律不諧不使句弱

詩話微生牽絲作宰不以簿書廢吟咏晚輯李獻吉何仲默王子衡孟
望之薛君采高子業劉子素張助甫謝茂秦九人之詩目曰梁園風雅
而以已作附之以為獻吉籍本扶溝聚族於斯婚嫁於斯長子孫於斯
營丘慕於斯非梁人而何君采之先出自偃師而隸武平亦籍茂秦為
趙王客因卜居子孫遂留不歸鄴志載在
流寓故亦入選中州之文獻得存其略焉

雨

高雲不可即飛雨作泥塗多難詩篇減新涼病骨蘇貧
仍雞鶩食愚任馬牛呼往事庸堪問空嗟白日徂

黃儒炳 一首

儒炳字士明廣州順德人萬曆甲辰進士改庶
吉士除編修歷右中允左諭德右庶子遷南京
國子祭酒升吏部右侍郎轉左侍郎兼翰林侍

讀學士有影木軒集

經始興江口

三楓亭下路不盡瘴雲鄉亂石千峰落斜階一水長樓
船通漢將鏡吹發陳王往事東流盡棲鴉遍夕陽

汪 輝 一首

輝字德仲休寧人萬曆甲辰進士改庶吉士授
編修歷官吏部左侍郎協理詹事府事

春日山行

過懶倦宦遊歸來且多務命駕偶山行始叶泉石趣入
澗窮窈窕陟峰出雲霧細雨灑春寒輕風飄日暮俄為
桑門訪忽值友生顧蔬酌供野興晤言寫情素高原恣

遐眺幽徑暫閒步眷此永日歡信彼頽齡度城市苦氛
躑誰能舍之去

周炳謨 一首

炳謨字仲覲無錫人萬曆甲辰進士改庶吉士
授簡討歷贊善諭德少詹事以禮部右侍郎協
理詹事府事卒謚文簡

登雞鳴山寺

琳宮突兀雞鳴嶺極目風烟天地寬山疊亂峰來北岳
水連千峽入桑乾誰人禾黍谿邊種幾處牛羊谷口看
塞下只今歌樂業暮南昨日到呼韓

吳應琦 一首

應琦字景韓桐城人萬曆甲辰進士歷官南京
大理寺卿

滇中有懷

南詔春深暮雨昏懷歸畏有簡書存三年雪鬢行荒服
萬里冰心荅至尊永夜衰親頻入夢何時穉子一迎門
龍眠櫻筍聞無恙短褐黃冠是主恩

劉士驥 一首

士驥字允良禹城人萬曆甲辰進士改庶吉士
授簡討有蟋蟀軒詩草

長陵陪祀作

赤縣歸真主青山鎖故宮玉魚沉永夜石馬立西風霜

露秋容肅椒蘭祀典崇明裡鸞馭在濟濟駿奔同

過庭訓 一首

庭訓字爾韜平湖人萬曆甲辰進士除江陵知縣擢雲南道御史督學南畿遷江西參政轉福建按察使升應天府丞有平平草

辛酉秋日游茅山

海內真靈居茅山踞如虎舊傳三弟兄各作一峰主仙人長往來華陽稱洞府百里借遊遨信宿樂茲土是時秋正清諸峰可歷數高觀揭天中時有白鶴舞地肺豈虛名真誥傳自古何當騎茅龍豈復戀圭組

魏 濬 二首

濬字禹欽松溪人萬曆甲辰進士除戶部主事歷員外郎中出為廣西提學僉事仕至右副都御史巡撫湖廣有峽雲閣存草

墟上詩 二首

箬籃雙放壘頭安却坐林邊解竹簟椽葉結衣慵避濕青紗裹額不愁寒萋根對語時還嚼車騎來過亦聚觀此去茅邨應未遠滿溪澀勒翠團團
紆迴巖徑轉嗟峨笑問蠻家第幾窠入市每衣芒木布出門時唱浪花歌峒下慣箬穢狐矢獐女能拋織貝梭墟散盡投歸路去斷烟半隴冒荒蘿

沈 珣 四首

明言經卷五十九
三
珣字幼玉吳江人萬曆甲辰進士授中書舍人
選山東道御史巡按貴州尋轉福建參政歷湖
廣按察使河南右布政司山東左布政使擢都
察院右副都御史巡撫山東有淨華菴橐

詩話先伯祖贈尚書君與公為沈公分按京闈所拔其後中以婚姻公
之曾祖漢正德辛巳進士伯位隆慶戊辰進士同懷兄琦境從兄璟璿
先後皆衣柳汁釋褐門才之盛甲于平江而子姓繼之文采風流代各
有集則尤世祿之家所難矣晚愛逃禪所至解舍其事埽除笑以為
傳舍何必乃爾公曰宛其死矣他人入室吾未見故
廬非傳舍也其達觀如是詩頗圓熟略與弟雁行

春日懷長兄在燕

聞道幽燕地蕭條異故鄉沙昏天欲黑春半草猶黃馬
足衝霜冷鴻聲聽夜長今宵千里月飛夢舊池塘

鄭州道中

鄭州城北水連空蘋葉荷花處處風無數沙鷗飛上下
馬頭仿佛見江東

江南春

繁花紅映赤欄橋楊柳新隄繫画橈三十六陂春水碧
滿船明月一聲簫

女郎綺生卜居江上

窈窕紅樓隔舊京重簾瑟瑟擁雕楹樓前咫尺官橋路
認得蕭郎白馬聲

王象晉

一首

象晉字子進濟南新城人萬曆甲辰進士授中
書舍人遷禮部主事謫江西按察知事稍遷行

日言終卷五十九
人司副轉禮部員外歷郎中出為浙江參政官
至浙江右布政使致仕卒鄉人私謚康節先生

言志

通籍三十年息肩猶未得靜中自尋思永夜勞轉側來
日苦無多胡不惜筋力富貴如浮雲百歲猶頃刻世塗
多險巇反覆無終極何不早挂冠戚友相親慳西塾課
兒孫東臯藝黍稷早畢公家賦早完私家債濁醪聊適
口麤糲堪供食八口可無饑四鄰好為德時而曳杖游
時而曲肱息一事不縈懷兩耳常緊塞用以怡吾神倘
徉華胥國

樊良樞

二首

良樞字尚默進賢人萬曆甲辰進士歷官廣東
右布政使有三山二酉等集

暮春登滕王閣

江上春歸思渺然危欄百尺瞰寒烟美人南國銷芳草
帝子東風怨杜鵑半嶺孤雲銜落照一颿遠水淨浮天
月明十二樓頭曲夜夜吹簫到客船

登岳陽樓

楚館迢迢楚水長雨餘新漲下瀟湘九歌緩節迎河伯
千古傷心弔國殤肉食幾人憂社稷野謀無計奠疆場
衡雲莫障長安日搔首青天望帝鄉

祁承燦

一首

承燦字爾光紹興山陰人萬曆甲辰進士授寧陽知縣調長洲遷南刑部主事轉兵部歷員外郎中出知吉安府京察謫沂州同知稍遷宿州知州入為兵部員外歷河南按察僉事副使江西右參政有澹生堂集

詩話參政嘗於藏書將亂其家悉載至雲門山寺惟遺元明來傳奇多至八百餘部兩葉兒樂府散套不與焉子猶及見之其手錄羣書目八冊今存古林曹氏寺中所儲已盡流轉於姚江禦兒鄉矣

聞警

醫巫間下水東流填盡枯骸剩作丘當局豈皆肉食鄙
傍觀寧盡杞人憂既知殘奕惟爭劫坐視危檣欲覆舟
可是樞臣饒遠策故將鎮靜作良謀

劉遵憲

一首

遵憲字可權大名人萬曆甲辰進士除壽張知縣調滋陽升戶部主事累官兵部尚書改工部加太子太保有恕醉齋集

寄書兒曹修葺山居

自悔出山誤由來歸夢頻每看客邸月偏憶故園春鳴
鳥驚時變叢荒著雨新可憐湖石畔只少白頭人

王湛求
云香山

詩歌舞扇風花障上幾時曾画白頭人
惟白頭不入画屏此湖石畔不可少也

凌漢翀

一首

漢翀字峻卿長洲人萬曆甲辰進士除福清知縣選陝西道御史贈大理寺卿

詩話張子野吳興寒食詞中庭月色正清明無數楊花過無影余嘗歎其工絕在世所傳三影之上詠梅者類取材於疎影暗香侍御獨以無影形容之亦奪胎法也

詠梅

玉榮含風香苔枝帶霜冷夜靜月冥濛空庭卧無影

閻世科 一首

世科字伯登太原人萬曆甲辰進士除湖州推官入為戶部主事歷郎中出知河間府轉布政司參議

楞伽臺

垂老投簪穩憑萬對酒聞江風梳白髮海霧暮青山日極秋天遠身依莫鳥還禹功遺跡在千載喜追攀

劉脣昌 一首

脣昌字燕及桐城人萬曆甲辰進士知宜黃臨川廣濟三縣遷南京大理評事歷官興化知府有遷草觀草遊草

潘蜀藻云廷評詩不假思索衝口而出往往有逸氣間似香山

增城流杯石

增江有怪石形容類虎丘亦可坐千人而多巖厓幽曲澗自天成或云鬼斧修仰承千丈泉驚湍變安流土人不好事經年罕來游我行及暮春風日妍且柔結伴得數子大半高陽儔脫烏坐曲澗杯盃任所投欲去忽復往將沉還能浮徘徊若就人想為知己留觀者盡拍手我意徒夷猶歎息下山去空坡驅羊牛

范汝梓 一首

汝梓字君材鄞縣人萬曆甲辰進士除工部主事謫酉陽宣撫司經歷累遷任襄陽推官入為刑部主事歷員外郎中出知延平府拾遺謫襄陽同知尋守襄陽卒于官

采蓮曲

風吹荷葉十里香采蓮女兒矜豔妝擢聲驚起雙鴛鴦雙鴛鴦何處宿白蘋灣紅蓼谷

戴者顯 一首

者顯字令微桐城人萬曆甲辰進士禮部主事有梳河集

南旺湖 古為陸地云即大野

異代南湖水猶存大野名秋風一夕至蘆荻有餘清蕩漾浮堤淨微茫入檻明時時陰雨裏髣髴魯諸城

明詩綜卷五十九

明詩綜卷六十

小長蘆 朱彝尊 錄

休陽 汪文柏 緝評

李流芳 十一首

流芳字長蘅嘉定人萬曆丙午舉人有檀園集
山中喜張魯生至同尋熨斗柄坐湖邊竟日而還

偶作

貪游不知止足力疲屢試起晚日當午偃曝聊自恣忽
聞故人來發我湖上意出門何翩翩兩足殊快利嘗聞
熨斗柄頗怪此名異昔年過其下髣髴已忘記今日天
有風湖山想奇致相與歷西磧山窮見湖勢沿流正縈

紆撫石得小憩飛湍擊嶂穹壁立巖肩洗出如削成
斗絕畏崩墜閃爍絢丹堊剝落疑文字傾厓側足過陰
壑緣藤縋燕磯與鼃渚生平快游地遂擬兼勝槩恍忽
理夢寐高歌過水聲浩蕩入胷次吾欲乘長風悠然向
天際惜哉多舟楫使我不得濟

過皋亭龍居灣宿永慶禪院同一濂澄心恒可上人步月

每多方外游見僧即如故燈明一龕下夜長愜深悟不
知山月上千林已流素出門尋舊蹊愛踏松影路幽泉
洗我心微鐘杳然度

戲示山中僧侶

山居不須華山居不須大所須在適意隨地得其槩高
卑審燥濕涼燠視向背樓閣貴軒翥房廊宜映帶或與
風月通或與水木會卧令心神安坐令耳目快皋亭美
林壑中壙亦稱最一樓負山立圭竇如向晦山僧請余
住余性苦不耐勸令開八牕咄嗟變湫隘前楹布清陰
後戶攬蒼靄玲瓏稱人意蕭爽出塵界灑然謂山僧此
中固有解往住山人不知山好在我昨居新菴結構
亦可怪居然仇涼風似欲杜靈籟古梅如老宿亭亭使
人愛其下安竈突柯條半焦壞悲哉冰玉姿坐受熏灼
害見之熱五內如身被桎械誰當共拯此移竈出樹外
面南闢小扉日與香雪對區區一緡費功德及萬倍吾

言不見用終爲未了債

訪秦心卿溪上嬾園不遇有作

溪上好園亭君家聞最勝經過已廿年今始識三徑翳
然臨水間愛此飛閣映位置不在多貴與風物稱主人
意疎豁事事得真性我來不相值維舟柳邊暝見戴自
無須悠然發孤詠

贈別洞庭葛實甫

我懷洞庭月欲醉莫釐峰幽意久不愜高人今乍逢新
詩正堪把歸櫂阻相從却羨秋山下丹黃已萬重

黃河夜泊

明月黃河夜寒沙似戰場奔流聒地響平野到天荒吳

會日以遠燕臺路正長男兒久爲客不辨是他鄉

訪慧法師於皋亭桐塢作

不見皋亭慧法師每勤書札慰相思蹉跎又作三年別
慙媿終無一往時忽憶虎溪成舊社且尋茅屋賦新詩
關門短櫂衝炎去黃鶴峰頭月上遲

元夕雨邀里中諸君小飲檀園燈下次伯氏韻

花邊樓閣月邊廊更愛繁燈照夜光雨氣無端先客到
檐聲應爲和歌長城頭結綺人俱散邨裏迎神鼓不忙
且盡一杯酬令節泥深門外亦何妨

爲陳維立題輞川畫

吾愛華子岡輞川流日夕如何舍此去傷心賦凝碧

雨中看梅西磧即事

邨園門巷逐花低
藤蔓桑條咫尺迷
花底泉聲認歸路
沿流直到石橋西

題画似雪嶠師

千峰頂上只通雲
一水人家別有邨
直到前山蘭若路
清鐘落日不逢君

成靖之 一首

靖之初名基命字志于
大名人萬曆丁未進士
改庶吉士授編修累官
吏部侍郎進尚書入東
閣加太子太保禮部尚
書文淵閣大學士贈太
保謚文穆有雲石堂集

送劉紫芝南還

遠別人情惜君歸
更若何匡時憐道直
涉世患才多路
柳催春去江風拂
櫂過還應逢雨露
且莫怨蹉跎

錢龍錫 二首

龍錫字稚文號機山
松江華亭人萬曆丁未進
士授編修歷中允諭德
以少詹掌南京翰林院
升禮部尚書東閣大學
士召進文淵閣加太子
太保致仕歸尋逮繫詔
獄論斬得釋戍定海衛
久之還里卒于家有
競餘存彙

靜志居詩話公始入閣思陵命定附魏瑞請逆臣案出黃羅囊示之且曰忠賢一豎何能為皆外庭力為諂諛至此囊中章疏悉燬奄人實蹟也公乃取以論罪分別重輕凡六等又慮罪人狡辯因請於諸臣姓名下各注所犯俾服其心逆案既定黨人銜怨刺骨袁崇煥經略遼東入

見帝夫言期以五年奏功公疑焉退而詣之曰子方略將何如對曰不
外東江關寧兩路進兵爾東江者島帥毛文龍也公曰舍關寧實地而
問海道何與對曰譬如奕然局有四子東江其一也可則用之不可則
有以處之崇禎二年五月崇煥行邊至雙島召文龍至以餉金十萬犒
其師自與文龍登舟相視山海形勢酒間勾隊島帥麾下以邊警報者
踵至崇煥乃疑曰吾軍亦有偵探卒何以不一至此速吾行爾起數其
跋扈拔高方劔斬之聲其罪置帥而返全軍莫敢譁也及大安口失事
都城被圍崇煥勤王師至廷臣多言崇煥之殺文龍陰為主款地思陵
大疑尋有旨俾歸城入下之獄訊叛狀於是御史高捷劾公與秦同謀
崇煥既誅御史史堃劾公逮繫詔獄論斬有司設廠于西市將用夏言
故事既而緩法左中允黃道周給事中劉斯球先後為公訟冤得釋戎
定海衛居戍所九年乃還崇煥之死詳載本朝實錄操史筆者不可
知不

初入翰林述志

皇風被奕葉師濟協重熙妙選金閨彥登茲白玉墀
漸予蹇劣士何幸沐恩私就將彌日月摹範承師資雖蟲
既云拙温飽匪所思獨此葵藿心耿耿誓不移念昔皇

祖日講藝恒孜孜天顏瞻咫尺密室奉疇咨衮德信多
補臣忠實在茲顧問久寂寞簪笏徒委蛇四郊漸多故
啓沃効者誰所願回宸照堂廉路不岐

題函風七月圖

國本民生繫深思草昧存淳風懷瑾戶美俗寫朋尊卜
洛從何始承邵信有源艱難開聖主告誡切文孫拭目
丹青麗賡歌雅什温思隨工瞽誦欣望闢虞門

楊連一首

漣字文孺應山人萬曆丁未進士除常熟知縣
徵授戶科給事中歷禮科都給事中升太嘗少
卿擢右僉都御史進副都御史死璫禍贈太子

少保左都御史謚忠烈有集

詩話六君子被逮周翰袁軫顧三公以五月到北司魏楊左三公以六月到北司比較之日六君子伏檐溜下楊居中左居楊之左魏居楊之右顧居魏之右周居左之左袁居周之左許顯純初猶作爾汝稱旋竟呼名叱咤獄吏有稱犯官者顯純怒罵曰此等犯人爾何官之有其刑具有械有鐐有棍有桎有夾棍遇此較流血灑地楊左魏三公先斃次袁次周次顧投縲而逝是年六月詔獄土地祠前樹下生一黃芝六君子至日光彩映人環視適六鞫見者疑吉兆顧公歎曰芝瑞草也而生于獄其妖乎未幾六君子皆斃于獄楊公之歸櫬也負以二騾其子及一二蒼頭徒跣道上行路皆為飲泣云

題柏子園青芸閣

官閣凌空汶水深金飈初動客登臨浮雲易改三山色
落葉先驚萬里心江上美人遺雜佩城南少婦拭清砧
繁臺兔苑今禾黍日暮憑闌思不禁

左光斗一首

光斗字共之桐城人萬曆丁未進士授中書舍人擢浙江道御史升大理寺丞進少卿終左僉都御史死璫禍贈太子少保右副都御史謚忠毅有集

詩話萬忠貞之死忠毅哭之以詩有云我有白簡繼君何能已與君同游杖下矣丹心留在天壤間默默之生不如死是亦不愧其言者也詩多晚唐風韻如濕雲留野樹晴雪照征衣凍犬迎人返飢鳥下食齊一觴邀老友隨意發新歌過雨煤錢長將炎水價添野牆藤蓋瓦邨落樹為橋問節驚初度思親改歲華疲驢衝道路破帽出都門宛然鄭都官姚少監遺格

憶龍眠山居

卜築傍龍眠雲深一徑穿源窮纔見屋山盡忽開田芋
采新栽得芻蕘任往焉笑余緣底事一別動經年

顧大章一首

大章字伯欽嘗熟人萬曆丁未進士除泉州推官改補常州府學教授稍遷國子博士轉刑部主事歷禮部員外郎出為陝西按察副使被逮卒于獄贈太僕寺卿謚裕愍

詩話楊忠烈攻魏忠賢人疑其草者繆文貞王莊毅攻客氏人疑其草者顧裕愍此兩公所以不免也裕愍與弟大韶仲恭詩義妙絕時人詩特具體而已

被逮道經故人里門

檻車塵逐使車轅一路知交盡掩門猶喜多情今夜月斜窺樹隙照離尊

李標一首

標字建霞高邑人萬曆丁未進士改庶吉士除

簡討累官太子太保禮部尚書文淵閣大學士

題梁慎可墨香亭

古樣蕉衫白接籬芳亭長日坐支頤焚香自悟無生設拈筆閒摹有道碑竹韻松濤清自遠花觚茗盃靜相宜近來愛寫黃庭否好換新鵝浴小池

許令典一首

令典字稚則海寧人萬曆丁未進士官至淮安知府有靈泉言賦史集

詩話稚則一官不達意薄淮陽散髮歸田陶潛之屋不豐范蠡之舟偏小籃輿竹杖紙帳繩牀雅饒樂趣所云愛官何似愛吾廬也詩取適意無意求工蓋本於香山擊壤

題陳平叔陋巷

日言錄卷六十一
狹巷難容旋馬小池也愛籠鵝客來兒子教揖興到老
人自歌

馬德豐 一首

德豐字以容平湖人萬曆丁未進士改寧國府
學教授入爲國子監博士遷刑部主事歷郎中
卒贈太常少卿

曹園讌集

名園成勝引畫榭出疎籬不厭杯頻勸何妨席屢移暮
煙停客權宿雨亞花枝興劇忘歸去娑拖月上時

鄒維璉 六首

維璉字匪石江西新昌人萬曆丁未進士除延

平推官徵授南京兵部主事歷員外郎中改吏
部坐削起南京通政司參議遷行太僕少卿以
僉都御史撫福建終兵部右侍郎有願學編官
游友白導噫等集

述懷

羶塗難久居盛名寧久留所以鴟尾子五湖一扁舟應
無雄辨士俯徇燕客求四時忌成功急湍無安流美服
人所指權利倍添憂

古意

百年苦瞬息人事復乖違園中桃與李安能久芳菲天
風掃枯葉北鴈忽南歸嗟我行役人年年戌金微盛臬

自西來游子未授衣嚴霜墮關塞明月照孤幃兩地共
搖落兩情共歛歔

秋興

鷓鴣得腐鼠輒以嚇鷓鴣鷓鴣飲清露高飛棲碧梧飄
然樊籠外野性常自如鷓鴣即飽食能無畏張弧古云
鹿生山命已懸庖廚達人訪物理深藏賦遂初

初至夜郎

遠戍天涯事可悲疎狂真負聖明時誰言鴻鵠能千里
差喜鷓鴣託一枝草野數懸丹闕夢鄉園空望白雲垂
高山流水情堪詠已擬埋名老下帷

閨怨

妾恨憑誰寄君懷祇自知堂前雙燕子歲歲赴春期

陌上偶成

青青道傍柳轉眼忽成圍男兒客他鄉不知歲月非

徐從治一首

從治字肩虞海鹽人萬曆丁未進士除桐城知
縣改武學教授轉國子助教遷南禮部主事歷
郎中出知濟南府以山東按察副使分巡兗東
以布政司右參政分巡濟南加右布政使請告
歸起薊州兵備道尋加左布政使復移病歸再
起山東武德道兵備超拜都察院右副都御史
巡撫山東萊州被圍中飛礮死事聞贈資善大

夫兵部尚書賜祠曰忠烈有集

詩話徐公平白蓮賊擒其魁徐鴻儒脅從四萬六千餘人悉赦固治其奉命填撫山東詔駐青州而公以叛軍將掠萊州特與防撫謝璉治守城具三宿而寇大至固守七月為礮石碎廟殞于城上合乎以死勤事之祀典矣公孫曰全曰令均有文采以公遺詩三篇見示因錄其一反覆誦之不異張中丞接戰春來苦孤城日漸危寒瘡猶出陣飲血更登陴之句也

入萊州城被圍作

崇禎五年春帝命師中錫俾撫大小東星言事羈勒於時二月朔告警馳羽檄叛軍無安巢掠地恣所歷萊牧實要衝羣兇首矍踴雖有防守臣敵甲同袒裼詔許駐青州欲往寸心怒萊民亦吾民不忍付焦溺單車指危邦夫豈尚沾激須臾寇果臨疾風走沙礫孤城露南隅三面受鋒鏑雲梯匪一層地道發重甓捷如猱升木多

於螳緣壁穴以穢熏尸臺縱火燔荻相隨八十騎騎奮長矜自顧一書生乃當萬人敵援兵絕虵蟬礮石轟霹靂誰與生厲階失計遂貽感一星燄不撲燎原眾斯惕兩葉生不除須用斧柯析奈何肉食謀議撫不議擊養癰久必潰累卵危終殞哀哉此邦人何讎委虺蜴效死職所甘智已窮墨翟

沈聖岐 二首

聖岐字千秋烏程人萬曆丁未進士除工部主事歷員外郎中出知濟南府

送閔昭余出守漳南

閩南虎竹三千里茗水漁村二十年別後相思夢何處

刺桐花發海雲邊

即事送吳翁晉

百尺飛絲送柳花青春欲暮未還家揚鞭忽到鳴篳處
一笑初停白鼻騮

錢文薦 二首

文薦字仲舉慈谿人萬曆丁未進士知新野宜
春二縣入為工部主事有兩囑樓集

詩話仲舉論詩升少陵於堂置之首座青蓮次之高岑王孟又次之餘
予隅坐侍酒而已自謂吾輩於此不可不占一坐否亦須坐兩廡中聆
鐘磬管絃之盛然觀其製作未免慙鈍壁之於樂僅比於枕歌控榻焉
爾至駁顧茂齊謂少陵詩窮後工以為非是詩至少陵窮固工不窮亦
工也斯
言得之

月下懷馮正子太史

夜坐林木清見此池上月羣峰忽已淨孤雲澹將沒愁
深白鷺渚夢斷蒼龍闕望望曙河遙思君不可越

山居雜興

自埽閒房卧能令俗慮輕披簾邀乳燕挈榼赴遷鶯海
味梅魚滑山毛竹筍清湖天思盪漿恰喜報新晴

趙 岫 一首

岫字子函一字屏國盩厔人萬曆己酉舉人

詩話子函好古擬石墨鑑華關中金石
藉其題識詩不見醜尚存康王遺格

茂陵

黃山歷盡見孤城城上樓高眼倍明芳樹寢園今北望
暮雲宮闕舊西京芙蓉畫冷仙翁露苜蓿春閒宛馬聲

回首長楊誇獵地何人得似子雲名

韓敬一首

敬字求仲歸安人萬曆庚戌賜進士第一授修撰尋謫行人司副

題南陔山房

碧山初築澗之濱選石疏池位置新坐守庚申偕道士橋名丁卯續詞人深情只託支頤笏時樣爭傳塾角巾縱是漁師魚不賣暇從秋浦戲垂綸

張慎言一首

慎言字金銘陽城人萬曆庚戌進士官至吏部尚書有泊水齋集

詩話尚書雖歷崇階傾心下風雅之士聞詩人陳昂捆屨布卦卒窮以死語所知曰自今入市門見賣菜傭皆宜物色之恐有如白雲先生其人者嗚呼今人論撰述率先揆其仕路之通塞以定文字之佳惡取舍由茲分焉江河日下安得聞此長者之言

過洹水將入里有懷長安故人

洹水纔過丹水流客愁爭似水悠悠汀洲綠映征袍淺桃李香迎語鳥柔耽靜計將書卒歲懷人豈但目三秋歸來鄉里都如故晚計方思馬少游

丘兆麟一首

兆麟字毛伯臨川人萬曆庚戌進士除行人選授雲南道御史升太僕少卿以右僉都御史巡撫河南有玉書庭集

洹河

四月泐河濱運艘千百樣我舟銜尾來偶與同起止八
牕閉九日一旬得百里前塗牕更繁閉者轉難啓轉漕
四十斛至僅一石爾庶土勤輸將咽嗟實在此一夫若
當關萬夫不足恃意外事未然平陂亦物理君相共策
籌庶乎消不軌

文翔鳳 一首

翔鳳字天瑞西安三水人萬曆庚戌進士除萊
陽知縣調伊陽再調洛陽遷南禮部主事調吏
部升山西提學副使入為光祿少卿有伊川海

日雲門諸集

錢受之云天瑞詩離奇舉凡不經繩削騁其才力
可與唐之劉又馬異角奇鬪險如魔波旬具諸天
相能與帝釋戰遇佛出世不免愁宮殿震壞

詩話學有異端詩亦有異
端文太青王季重是已

望唐陵

北望唐家十八陵寢園貴主亦相仍惟將憲廟除樵採
不為明皇具禴蒸幸蜀山川幾板蕩平淮天地再清澄
奉先橋首堯山好柏路遐探憾未能

鍾惺 四首

惺字伯敬景陵人萬曆庚戌進士除行人升工
部主事改南京禮部主事進郎中遷福建提學

僉事有隱秀軒集

錢受之云伯敬少負才藻有聲公車間擢
第之後思別出手眼另立深幽孤峭之宗
以驅駕古人之上而譚生友夏為之應和海內稱詩者靡然從之謂之
鍾譚體譬之春秋之世天下無王桓文不作宋襄徐偃德涼力薄起而
執會盟之柄天下莫敢以為非伯也數年之後所撰古今詩歸盛行於
世承學之士家置一編奉之如尼丘之刪定而寡陋無稽錯謬疊見詩

歸出而鍾譚之底蘊畢露滿澗之盈於是乎涸然無餘地矣迹其所謂
深幽孤峭者如木客之清吟如幽獨君之冥語如夢而入鼠穴如幻而
之鬼國浸淫三十年俗易風移滔滔不返
而國運從之殆五行志所謂詩妖者乎

詞話禮云國家將亡必有妖孽非必日蝕星變龍螭雜禍也惟詩有然
萬曆中公安矯歷下婁東之弊倡淺率之調以為浮響造不根之句以
為奇突用助語之辭以為流轉著一字務求之幽晦構一題必期於不
通詩歸出而一時紙貴閩人蔡復一等既降心以相從吳人張澤華淑
等復聞聲而遙應無不奉一言為準的入二豎於
膏肓取名一時流毒天下詩亡而國亦隨之矣

再登浦口王茂才山樓望石武庫澹寧所造新城
水上樓居忽有城重來翻覺類新成鶯花每次逢長夏
風日無端屬乍晴山對層楹還自若江添睥睨倍多情
亂帆屢向烟邊沒去遠參差却漸生

舟晚

舟樓頻易處水宿偶依岑岸暝江逾遠天寒谷自深隔
墟烟似曉近峽氣先陰初月難離霧疎燈稍著林漁樵
昏後語山水靜中音莫數歸鴉翼徒驚倦客心

送丘長孺赴遼陽

曲突何曾勸徒薪烽烟桴鼓重邊臣全遼三五年中事
爛額焦頭半楚人

桃源詞

商山海上半秦民何獨桃源是避秦滿洞仙人一漁子
翻疑漁子是仙人

王志堅一首

志堅初字弱生更字淑士崑山人萬曆庚戌進
士授南京兵部主事歷郎中以按察僉事提學

貴州不赴再起提學湖廣卒于官有香巖室草

錢受之云淑士讀書最為有法先經而後史先史而後子其讀經先箋疏而後辨論讀史先證據而後發明讀子則謂唐以後無子當取說家之有裨經史者以補子之不足讀集則定秦漢以後文為五編尤用意於唐宋諸家碑志援據史傳摭采小說以參覈其事之異同文之純駁其所著篇章甚富顧自定詩才七十餘首其矜慎若是

寄長蘅

吾觀仕宦人每每念丘壑雖復非真實茲意或間作譬
如酒食困番思茗飲樂病苟稍稍去旋復恣饒嚼嗟余
困折久本自甘蕩落茲游非得已黽勉就人爵人生能
幾何胡為久熏灼寧為沙上鷗毋取籠中鶴

尹嘉賓

二首

嘉賓字孔昭江陰人萬曆庚戌進士授中書舍

人升兵部員外出為湖廣提學副使有焚餘集

舟泊惠山夜坐思琴

昔年與之子把酒對瑤琴明月蒹葭浦秋江楓樹林
衣中夜緩落葉萬山深悵矣誰能理烟波不可尋

江上雜詠

河豚雪後春還淺刀鱗風來水已波攜酒江邊吹笛坐
看山何處出雲多

莊起元

一首

起元字中孺武進人萬曆庚戌進士除浦江知
縣調蘭谿遷南戶部主事歷員外郎中出知撫
州府官至太僕少卿有漆園卮言

紫霞洞

石室何寥廓蜿蜒信地靈洩雲終古白豔草自然青軒
帝藏神鼎淮王貯道經翛然來物外思鍊羽人形

鄭之文 一首

之文字應尼南城人萬曆庚戌進士授南京工
部主事歷郎中遷知真定府有遠山堂錦硯齋
集

金陵元夕

花下燈前出画裙衣香一路暗氤氳不知南陌人如月
但道東門女似雲

王象春 十首

象春字季木濟南新城人萬曆庚戌進士除上

林苑典簿遷南京大理評事歷工部員外改兵

部終吏部郎中有問山亭集

錢受之云季木詩如西域
波羅門教邪師外道自有

門庭終難
飯依正法

詩話萬曆中年詩派雜出季木自關門庭不循時習雖引關中文天瑞
為同調然天瑞太支離未免邪徑害田矣未若季木之無戾羣雅也題
項王廟壁一篇比於謝參軍鴻門作更覺遺鍊亡友頽川劉
考功公誠亟賞之幾於唾壺擊缺此非邪師外道之傳也

山老鴉

山老鴉朝東暮還西過河拾杜梨日晚腹飽不歸去繒
繳已伏河邊樹爾腹已飽爾不知飽人之腹良足悲

打棗竿

打棗竿光瑩瑩

廣韻永
兵切

岸上小兒赤身擎去而復來無時

明言錄卷之十一
十五
停終日剝啄不盈升低枝已盡高枝熟我竿恨無三尺
六

空城雀

空城雀飛且止不營棲巢不哺子相呼莫向網羅死

書項王廟壁

三章既沛秦川雨入關又縱阿房炬漢王真龍項王虎
玉玦三提王不語鼎上杯羹棄翁姥項王真龍漢王鼠
垓下美人泣楚歌定陶美人泣楚舞真龍亦鼠虎亦鼠

送友人

郭外溪邊寺年來兩送行攀條猶在眼落葉已無聲憶
昔春山色能輕故國情好將詩酒約歸問魯諸生

謁岳武穆廟

衰草寒烟日暮時傷心瞻拜岳王祠君王自得偷安計
臣子應班痛哭師東海未填精衛死南風不競社鶻知
由來和議非長策千古英雄恨莫追

硤石懷古

即嶠陵

真成箭括與車箱猶是千年古戰場想像國殤思蹇叔
時因風雨憶文王楚人一炬曾經入薊馬長驅亦未防
三復青蓮蜀道曲休令所守化豺狼

石城月

金陵王氣未曾消水泊秦淮江上潮月到石頭城下好
碧雲紅樹聽吹簫

山家

山家香穉飽椿芽雨歇籬傍自種花
割麥績麻旋剝棗一年三度坐牛車

不落夾

慈寧宮裏佛龕崇瑤水珠燈照碧空
四月虔供不落夾

內官催辦小油紅

馬之駿

三首

之駿字仲良新野人萬曆庚戌進士
除戶部主事歷員外郎中降廣德州
同知升應天府通判調順天尋復官
戶部主事終員外有妙遠堂集

錢受之云仲良與兄之騏時良並有詩名而仲良尤為秀發與鍾伯敬同時稱詩仲良持論欲極其才情之所之恣其意匠之所經營情景筆

墨之所稱愜遠救鋪陳叫躍之病近辭淒清寒苦之習不屑寄伯敬羅下位敬以其非同調也亦推而遠之少年盛氣腸肥腦滿多詩酒酣暢之致鮮師友鏘厲之功其最契合者吳門王留新安汪逸相與馳騁角逐往而不返以故時調狎出學古不純風格時患於蕪累波瀾未見其老成天若假年未見其止良可惜也

詩話仲良才頗縱橫微嫌圭黍未合

十方禪院

何處堪消暑非山即水鄉樹深渾欲暝
花近反無香欲晚波難綠迎秋木漸蒼
市譁原未遠烟景乃微茫

秋日草橋作

白屋邨邨度青帘面面迎野溪殘雨入
側樹早陰生梨棗過橋色雞豚近市聲
未論丘與壑出郭已多情

送劉四

別酒呼還輟欵欵百感俱兩年何事隔明日此身孤秋
水殘城郭清霜點驛塗故鄉歸總好高會復能無

陳翼飛

十五首

翼飛字元朋平和人萬曆庚戌進士除宜興知
縣被劾歸有慧閣長梧二集己未庚申辛酉壬

戌行卷

詩話元朋牽絲百里遽挂彈文坎壈終身賴詩篇以陶治集甚繁富幾
與明卿伯玉爭多史取一編惜乎未就觀其解組記自述與韓求仲偕
游金山有詩僧慧秀攜沈孝廉虎臣札來謁韓中稱引宜興吳徹如觸
韓怒嫚罵吳不絕口以慧秀詩挂松枝上斥而遣之慧秀訴之於吳時
沁水孫尚書居相以御史督漕漕吳嗾孫劾之代為草奏辭連鄒臣虎
湯嘉賓黨禍既成元朋一跌遂不復振矣牧齋錢氏與求仲臣虎元朋
皆同籍而列朝詩集削去不錄嗚呼柔海既遷猿鶴沙蟲
悉化而雌黃藝苑者黨論猶不釋于懷可為長太息也

齋居

白水浮官舍青山塞縣門案頭塵未積塵尾禿猶存莽
莽雲中樹瀟瀟雪後邨齋居春事少農務與誰論

溫陵道中

九日山前路登臨病未能烟蘿從磊磊雲樹幾層層豹
犬柴門月人魚海市燈不堪聞杜宇匹馬過溫陵

悵望

寂寂何多緒憑高魂易銷疎鐘蕭寺雨遠樹海門潮秋
月七千里春風廿五橋愁來頻徙倚蹋破小山寮

大湘灘

遮莫上瞿塘豔瀕大如象不見建溪石連亘三千丈

甘露寺

山色乍有無江光遞明滅夕陽大道傍行人讀殘碣
清湖舟中

枯柳霜中鵲長烟雨後山人來吹笛罷獨立碧溪灣
落星石

白榆何夕墮危石青如此疑是酒星沉渴飲湖中水
馬當

廟鼓持芭舞蠻歌日易斜分風能送客不忍打神鴉
檀公壘

故壘青仍在符鳩白不飛長城他日壞衰草夕陽歸
橫江館

橫江館外雲津吏莫東指但為放舟行風波日如此
赤欄湖

朝泛赤欄湖暮宿黃金浦多少采菱船來問襄陽估
武昌西門

郎採白蘋花儂開青箬酒夜宿武昌城朝折西門柳
上元夜別

金鴈鼓斜記昔年輕籠慢撚最堪憐四條絃索無端絕
一夕春風也颯然

荔支詞

梧州四月火山紅南海丹時黃雀風不及閩中焦核好
定應饒殺葛仙翁

無題

二月長安醉是鄉青樓繫馬拗垂楊可憐韋曲花如錦
惱殺相思賀二孃

賀萬祚

一首

萬祚字孝延嘉興人萬曆庚戌進士授刑部主
事調南禮部轉郎中再調兵部出為山東提學
副使歷福建參政廣西按察使以江西右布政
使分守嶺北道有大業齋集

陳孟常云孝延詩
寫情性質有其文

周侍御行部

蘭臺使者舊知名攬轡從容江海情抗疏共看任伯雨
行軍還擬趙營平五花驄馬巡周道三輔黃圖歷漢京
不獨艱危憂水旱前籌更欲請長纓

朱大啓

四首

先伯祖字君輿別字廣原萬曆己酉以秀水籍
順天鄉試中式庚戌賜同進士出身除南昌推
官擢吏部主事歷員外郎中崇禎初升太嘗少
卿轉太僕卿再轉大理卿遷刑部左侍郎贈尚
書有曼寄軒集

詩話東漢風俗之厚期功之喪咸得棄官持服如賈逵以祖父喪戴封
以伯父西鄂長楊弼以伯母繁陽令楊君以叔父上虞長度尚以從父
渤海王郎中劉衡以兄思善倏相楊著以從兄大嘗承謙左槐里令曹
全以弟廣平令仲定以姊王純以妹馬融以兄子皆以憂棄官輕舉至
晉而慈紹拜徐州刺史以長子喪去職陶潛以程氏妹喪自免作歸去
來辭自是而後古之道莫之行也先伯祖掌銓東曹開先文恪公之計
請于朝乞歸持服德陵允焉當時典禮者亦不以爲過斯國史所當附
書于禮志者此事尚未百年今則父母之喪有不去其官者矣先文恪
以宰輔歸所遺僅墓田七十畝先伯祖五倍之恒曰吾官階三品而恒
產倍蓰于保傅死何以見叔父地下鄉黨傳其言數清門者必先吾朱

明言總卷六十
氏焉先伯祖晚愛結方外社與秋潭萍蹤雪嶠諸
法侶游更唱迭和故曼寄軒集禪誦之言居多

良鄉除夕
時改歲元旦崇禎
紀元是日立春

古驛逢今夕他鄉對故人椒盤囊底舊霜鬢客中新守
歲剛辭臘乾元早布春聖恩方浩蕩何必歎風塵

經海印廢寺

我行海子橋不見鏡光閣惟有青蓮花涼風吹又落

自信州還貴溪

小艇恰容膝輕帆下溜灘忽聞津吏語斜月挂江干

黃巖道中

萬樹梨雲白滿山桃花幾點破紅顏春風盡日黃巖裏
數遍峰頭不肯還

郭忠宁 一首

忠宁字蓋卿吳縣人萬曆庚戌進士除刑部主
事歷郎中改工部出知河南府調台州道湖廣
按察副使終陝西右參政有也園詩藁

渡江

飄然一櫂泝空明日午春潮尚未生回首江南增客戀
新晴鐘鼓潤州城

崔世名 二首

世名字徵仲寧德人萬曆己酉舉人知連州有

秋谷集

詩話崔君令巴山有為魏璫祠請頌德詩者峻拒之遂被逮入都
下獄崇禎初釋還補官桂東尋司浙中離殄詩頗清徹無塵室氣

昔昔鹽

妙舞低垂手聽歌昔昔鹽
閨人雙淚迸遊子五湖淹
水餞春漸去堦延月影潛
嬌鶯藏樹澀弱柳覆堤纖
西舍徵簫板東鄰豔鏡匳
燈孤煤漸剔被冷夢難厭
鴈過衡陽斷雞催鼓角嚴
碧桃花又落蒼蘚逕仍添
帶減驚投玦釵塵罷卷簾
從來音信杳怕問卜書占
昔昔曾相約頻將舊語拈

重九章江門守風有賦

時將被逮

黑雲照空秋氣昏
章江城外逆水渾
封姨鼓浪掀江豚
招招舟子亦銷魂
酒罷問天天不言
野雞午叫黃花村
誰家買醉登高原
我已挂冠君落帽
擢髮數罪難具論

孫元化一首

元化字初陽蘇州嘉定人
萬曆壬子舉人從軍
贊畫由兵部司務進職
方主事天啓末閒住崇
禎初起武選員外郎
歷官都御史巡撫登萊
吳橋兵變坐失事論辟
有水一方人集

詩話初陽恍惚從軍歷三獨坐當崇禎初環名有兩頭蛇見里居樂在堂之南軒賦詩而行詩中自况卒成妖讖其外孫侯開國語余公遺集凡百卷詩僅存數篇錄之以當志怪

兩頭蛇

吾聞兩頭蛇其怪不可弭
昔賢對之泣而我翻獨喜
喜者意云何以我行藏似
蜿蜒不留停奔赴孰驅使
當南更之北欲進掣而止
首鼠兩端乎猶豫一身爾
蛇也兩

而一相牽無窮已混心腹腎腸各口頰唇齒畢生難並
趨終朝不離咫伸屈匪自甘左右何能以豈不各努力
努力徒縈象殺一誠便一一殺一亦死兩存終奈何聽
之造物理

卓爾康 一首

爾康字去病仁和人萬曆壬子舉人有修餘堂

集

詩話去病康濟之才著書等身惜不甚傳詩特露豹一斑爾

初晴許元昭招看吉祥寺梅

言別長干久相思積雨重忽驚梅榮發如與故人逢入
寺幽香繞方春冷豔濃憐君疎傲似相對益情鍾

李衷純 七首

衷純字玄白嘉興人萬曆壬子舉人選授如皋

知縣升南工部主事轉兵部員外出知邵武府

終兩淮鹽運使有激楚齋草

黃貞又云玄白詩博通而裁練藻麗而瞻達上湖建

安下連大曆可稱通才 李本寧云玄白為如皋今治聲冠於江北大學政事四科遂居其二 陳孟常云玄白才高學博千言不厭其多 詩話都運少以詩文受知於王元美元美集中載有贈詩既而上文郭美命從游葉進卿東林諸君子目以俊及筮仕維皋特多惠績立碑頌德者如林其卒也錢受之志其墓蓋循吏也吾鄉戚尚寶元佐撰構李往哲傳語焉勿詳近項明府玉節續之離使之治績闕而不書慮舊聞之放失附識於此

古別離

長安百尺樓其戶銜明璫峒堯入雲中雙闕遙相望明
月照玉顏皎皎流素光中夜理瑤瑟纖指發清商初彈

雙黃鵠再彈孤鴛鴦淒颼動羅帷餘響激微霜仰視河
漢直寒波浩無梁安得高飛翼為君凌空翔

春懷

貔貅十萬下遼陽經略專征有侍郎殺氣正殷箕子國
捷書空奏日南王蠻天轉餉愁中絕異域孤軍蹈險亡
何似乘機歌杖杜壁堅青海制扶桑

登岱

層巒絕巘轉氤氳倒影凌虛日觀分方詫河山同帶礪
忽驚噓吸總風雲珮環神女青霄度陸博仙人洞府聞
聖主明堂知欲啓將無重過稷丘君

送陳孟常太史奉使還朝

春風楊柳拂雙旌使者星輶返玉京一詔責躬憂漢主
九天持節識長卿花深禁苑分仙露月落宮城聽曉鶯
還念東南民力盡好從講幄達承明

浦口道中

今年十月氣尚暖江北宛似江南天未彫楊葉黃冉冉
欲吐麥苗青田田老農築場放犢卧少婦壓槽呼客前
長塗風景亦不惡馬蹄且踏寒雲穿

雨後

夜靜空山中鳥鳴知雨歇寂寂啓寒扉林端澹疎月

順昌道中

山如眉黛水如羅谿上人家繡戶多十五小姬催客酒

銀箏彈出伯勞歌

吳伯敷 一首

伯敷字同文宣城人萬曆壬子舉人

燕子磯同梅禹金作

江落鮫人窟磯傳燕子名濕雲拋雨散涼月帶潮生白浪浮虛閣青山挂斷城知君有高調流水若為生

李孫宸 一首

孫宸字伯襄香山人萬曆癸丑進士改庶吉士授編修歷左中允左庶子少詹事侍讀學士升禮部右侍郎進尚書有建霞樓集

陳皇士云嘉靖以來作者並起流派各別登壇樹幟者無慮十數家各執偏見更相訾謗要之不能歸於大雅先生以優柔之韻抒穩順之詞純古淡泊蘊藉深美

龍池社集

未盡登高興重來結伴游江山仍舊識寒意改深秋席地妨樵徑攀花作酒籌醉忘歸路遠還為夕陽留

曾楚卿 一首

楚卿字元贊莆田人萬曆癸丑進士改庶吉士累官禮部尚書

自芋原至車盤驛

數家烟樹鬱蕭森人語殊方莫辨音雲倚馬頭晴作雨松橫嶺口畫成陰關城晚色疎寒木古渡秋風亂夕砧信宿淹留吾有意故園已在白雲深

葉燦 一首

燦字以冲桐城人萬曆癸丑進士改庶吉士授
編修遷南國子司業歷左中允右庶子天啓末
削籍崇禎初起補少詹兼侍讀學士加禮部右
侍郎累遷南禮部尚書追謚文莊有天柱南中
廡下讀書諸集

抱病

別業空山裏孤燈獨夜身
交游江上涘風雨病中人
宿鳥翻深竹溪流響亂榛
居然成小隱日日白綸巾

李繼貞

二首

繼貞字散尹太倉州人萬曆癸丑進士歷官兵
部右侍郎有萍槎集

五人詠

義士殺人都市中姓名不藏身不匿明知國法熾如爐
况是鉗網當羅吉挺身就吏不辭家無勞伍伯來相逼
此時上官方自功御此五人如東濕夜提鈴晝設棘五
人齒冷笑不必一尉一人抵於法自相匹即令倍償之
二三亦已畢何煩五命酬一賊但取無失大璫心人命
草菅何足恤臨刑駢首受青鋒相顧慷慨無變色嗟乎
五人生為義士死作神不然厲鬼除君側

猛虎行

山深月黑風怒號猛虎磨牙求汝曹子欲夜行何處逃
歸來有吏夜守門追捕如虎憂心焚雞豚鬻盡將兒孫

不忍老年見生別寧拚瘦骨為虎吞同是猛虎此有冠
駟虞見之徒心酸同是猛虎此有翼狡狴見之亦變色
行乎行乎擇害莫若輕倖脫虎吻留餘生

王心一 三首

心一字純甫吳縣人萬曆癸丑進士由行人選
授江西道御史累官刑部左侍郎有歸田園詩

集

上太行

驅車上太行山頑無奇石逶迤有千盤石磴轉偏側譬
如摩空鳥漸與青雲迫俯見蒼崖間春花間紅白山家
愛尺土縱橫界如畫上有千年碑孔父留轍跡摩挲落
日遲返景射石壁祇慮豺虎驕解鞍投荒驛

歸渡揚子江

久客天邊路言歸江上舟山光分遠渚塔影漾中流薄
霧籠江樹平沙狎海鷗乘潮片時渡十里隔瓜洲

茗溪

細雨茗溪曲微風渡小航有園多種竹無屋不圍桑語
覺吳儂近流分震澤長烏巾春店近白酒熟盈觴

方震孺 一首

震孺字孩未壽州人萬曆癸丑進士除知沙縣
擢湖廣道御史巡按遼東被逮下獄崇禎初特
釋歷官都御史巡撫廣西

丁卯中元余在繫經三中元矣

黑海中元三度過青山一望淚滂沱浮生幾日仍衣食
鄉夢頻宵怯網羅心上孟蘭依古寺天邊墳墓近淮河
荒原秋草知蕭瑟况復傾巢江上波

繆昌期 四首

昌期字當時嘗熟人萬曆癸丑進士改庶吉士
授簡討歷左諭德死奄禍贈詹事謚文貞有從

野堂存稿

詩話六君子之獄多以攻容魏取禍文貞無言責而黨奄人者尤惡之
蓋以善謀見嫉也文貞與雁涇陽書云東漢南宋之事某感歎於中者
久矣互相標榜豈士君子之幸哉又與楊大洪書不肯歸矣便可不復
出又與葉臺山云不入長安門不知世路之險且惡也夫亦明哲之見
而終不免焉命矣夫

賦得夏母篇書文太君障子 有序

夏忠靖母廖夫人忠靖幼孤夫人教之嚴而愛
事姑甚謹姑病執其手語曰吾無以報汝願汝
壽過我子孫事汝如汝事我忠靖拜大司農夫
人年八十晉封太夫人三楊及胡祭酒諸公皆
升堂拜焉

忠靖掌邦計母廖尚皓首別殿賜宴歸高堂介眉壽是
時長陵中羣公竝耆舊三楊列館閣胡公為祭酒連鑣
登母堂却行拜階右鏘鏘委佩聲肅肅奉觴走母也徐
唱言雍容三爵後上云主恩深報稱莫相負下云計臣
勞提挈視吾友嗟此良宴會明時信非偶誰與矢德音

乃在一寡婦養姑泣下泉持家敝篋帚尚書信卿才訓
迪自黃口蟲魚箋獨勞釣軸教已久繇來孤貧兒往往
踐台斗

送門人程灝然

我已離羣久君能歲一來茶瓜談舊事水石坐新苔病
骨翻然醒愁容頓爾開且遲松際月莫聽暮潮催

賦得秋聲一鴈飛

浙瀝金風動碧林瑤空獨鴈助長吟聲寒絕塞三千里
影照長安一片砧秦隴雲橫朝起笛瀟湘月冷夜聞琴
於今聖世銷烽火北海應無繫帛音

洪葆原文關政報滿還朝

錦帆簫鼓出江湄水凍黃河驛路遲鄉味久應忘荔子
客情偏自憶尊絲閭門柳色非前日長樂鍾聲似舊時
聞道使君廉載石江東父老望旌麾

周宗建 一首

宗建字季侯吳江人萬曆癸丑進士除武康知
縣調仁和擢福建道御史巡按湖廣被逮死奄
禍贈太僕卿謚忠毅

詩話魏進忠未更名曰忠毅因水電即訟言攻之尋又上言乳母不當
入宮引王聖趙婕妤陸令萱以為前鑒及德陵遣劉朝行邊又言內臣典
兵有三不可九害以是客魏之黨齊怨公刺骨曹欽程舊知吳江縣事
遂希旨誣公削奪逮捕考訊九死無屈辭可云百鍊之剛矣詩亦慨當
慷以

感事

宮禁高皇誥尚存只今秉筆自言尊太阿已授宵人柄

一作彤弓還待賢人禮 壽杖齊沾聖主恩舊定朝儀增祿秩新開甲第

擬侯門驚心流禍中原遍未許蒼生得叩關

周順昌 二首

順昌字景文吳縣人萬曆癸丑進士除福州推

官徵授吏部主事轉員外郎死璫禍贈太嘗寺

卿謚忠介有燼餘錄

詩話忠介之逮在天啓丙寅三月校尉至知吳縣事陳文瑞持檄詣公公從容談笑入書齋理圖籍見案有素楮為龍樹菴僧乞書者泚筆揮灑拂袖而出入縣解越三日宣詔聚觀者累萬人巡撫立於左巡按立於右諸生王節等肅而前曰大人有事地方詎不知吏部居鄉之朝者今日人情如此明公獨不為青史計乎曷不據實上聞請外臺勘治撫按股栗不敢諾縱騎手銀鑄擲之地大呼因安在衆怒奮躍而登攀閣折楯歐諸校尉詰曰旨何從出曰魏上公於是衆共擊持偽旨者時大馬堂下萬曆齊擲縱騎伏撫按脇下一尉梁上驚墮而死是夜撫按

其疏告變捕十三人下於獄論五人入大辟五人者顏佩韋馬傑楊彥如沈揚周文元文元公輿丁也佩韋臨刑告知府寇慎曰囚等為周吏部死死於義非為亂也公既斃於錦衣獄歸葬白蓮橋南馬家墩崇禎初吳人毀魏忠賢普惠祠購佩韋等頭顱合尸葬於是曰五人之墓太倉張溥為作碑記先是御史倪文煥首劾公及敗畫見五人戎裝帶劍入其室須臾旌飾尊公來庭中石井闌忽飛起車轆震而去亦異事也公子茂蘭字子佩嘗鬻指歷血書疏草訟公冤故邀卹典特優渥子佩高隱不仕鄉人私謚端孝先生其血書副本尚存於家子曾見之為跋其尾

愁

獨坐鴈聲急風高秋氣空家書千里外舊事一尊中北地兵戈滿南園草木叢朝來看壯髮強半欲成翁

詠梅

春半梅將盡中庭尚一枝玉人何處是惆悵月明時

吳伯與 一首

伯與字福生宣城人萬曆癸丑進士除戶部主

事歷員外郎中出為浙江布政司參議遷廣東

按察副使有素雯齋集

李本寧云福生詩簡遠曠達兼彭澤左司香山眉山之長董思白

云福生騷賦古律體齊梁之綺靡兼燕趙之悲壯黃貞父云福生曠懷雄藻萬岑章柳惟所汲取而激越時近樊川張子環云宛陵若梅文學禹金湯司成嘉賓標新領異各成一家君大篇短什時效切磋古體高朗近體適逸不規規于形似詩話福生素雯集雖無與竟陵酬和之作似亦降心從之者

宿姑孰

作客休嗟滯浮生合自勞蘋花一枕對蘆荻片帆高生計存書史鄉心寄酒槽夜來寒不禁換却舊綈袍

汪康謠一首

康謠字唐徵休寧人萬曆癸丑進士除諸暨知縣降補順德府教授入為國子監學正遷戶部

主事歷員外郎出知漳州府終福建按察副使有葦倚園詩集

東阿道中

高岸深藏谷頽垣曲帶溪草香風過隴土滑雨沾犁沛水流終伏荒臺迹已迷前山不可極馬首暮雲低

沈萃楨一首

萃楨字君聚平湖人萬曆癸丑進士除工部主事改南兵部歷員外郎中出知蘇州府遷福建按察副使以參政分守蘇松道坐報吳江知縣曹欽程貪墨罷尋落職起補湖廣按察副使轉福建按察使以湖廣右布政使引疾歸

田園詩

不淺鱸魚與君恩許挂冠城陰三畝宅日暮一漁竿風
翻秋飛鴿花泥晚種蘭兀然微醉好高枕傍闌干

方尚恂 二首

尚恂字威侯淳安人萬曆癸丑進士除刑部主
事歷員外郎中出知建寧府遷湖廣按察副使
謫真定同知改衛輝有玉磬齋詩集

焦山

危嶼江天峙烟光寫翠微吹波豚下上狎浪鳥翻飛客
與愁猿竝僧呼老鶴歸潮痕出深樹片片濕征衣

曹操疑冢

漳水築荒臺臺荒銅雀失不知青蒼瓦後自何陵出

沈鳳超 一首

鳳超字可凡鄞縣人萬曆癸丑進士除海陽知
縣遷工部主事道卒

自君之出矣

自君之出矣妝奩日掩塵君心如明鏡獨照眼前人

俞琬綸 二首

琬綸字君宣長洲人萬曆癸丑進士衢州西安
知縣有自娛集

明朝別

醉子黃金卮一卮一番換明日山上山相思旦復旦

古意

不與子同行願與子同夢隨子夢所之相憐不相送

羅賓王 二首

賓王字季作番禺人萬曆乙卯鄉薦仕為南昌府同知有散木堂集

詩話季作罷官歸築哭斯堂於里門或怪其誕然方其佐郡欲率師勤王居恒恍惚好談天下事及陷身犴獄志不少挫詩歌多憤懣之詞亦奇十也

辛巳三月寇陷襄陽弒襄藩逾旬破洛陽福藩死之兩郡居民屠戮不可勝紀

文士侈言兵希取印如斗積誤非一朝寇至如拉朽召募煩中樞司農勞稅畝竭粟養驕兵漸積成敝苟卒爾襄陽城藩封失其守城陷鼓聲死日落大旗走曾聞賜上方三載專征久勉死謝三軍徒為軍國醜嗟彼泄泄人處堂不思咎悲憂草野人抱膝徒白首

春日送友人入虔州

旅鴈歸不盡春風朝又過東郊一以別青草更如何客舍炊榆火征衣換越羅關河莫回首楊柳暮烟多

崔培元 二首

培元字辰長海鹽人萬曆乙卯舉人官青陽知縣有橫山草堂集

長安 二首

陳寶開隆祀昆明辨劫灰古來成帝里今日自樓臺國

明詩綜卷六十
事紆西顧天威儼北來綢繆關陝地豈獨武臣才
鶉野天文布龍山地軸雄翦桐開國事累葉後賢功車
馬黃塵裏關河紫塞中從來興王地文物兩京同

明詩綜卷六十



